

重刻確菴曾先生西蜀平蠻全錄卷之十二

翰牘

閩外  
筆籌

與劉將軍一

昔島夷搆亂吳越閩廣之間騷然不寧得一名將東  
征南伐江海波澄屹若長城之倚者稱將軍之功盈  
耳也不謂厚倖忝巴蜀之役蠢茲蠻民業已借戈旄  
而彈壓之當得共事比力以報

主上鄙人有重賴焉雖然將軍奚有於蠻民哉辟之  
于將莫邪以辱試豺豕必不勞餘力第未知蠻民能  
早自爲計以逭天誅否也以將軍威名震疊戎心非





在今日其必畢謀殫慮求以平定安輯之且恐朝廷別有推轂於將軍能無了此而後朝食乎軍務勞苦又遠念鄙人感慰感慰面晤有期詞不多及

二

貴州移文亦先事之備中間機宜諒將軍自得之若疏則日下行美頃得螺螄之捷良慰良慰非將軍先機分兵助守恐必致失事懸賞一節本院斷然行之如有食言天日可鑒寧罷官長往不肯負有功之人也願將軍以此意宣布之

三

蠻近覺竊肆殊可怪恨大渡河之兵已於二十四日往調矣戎長江安之間委是兵少前將軍所開郭總兵須及時用之防剿彼處一則報

君恩二則雪父恨三則酬將軍前後推薦之情此一大機會也詳在公移中將軍更須激勸鼓舞之渠若能以

君父爲重自承任一隅相機剿殺何必身爲大將而後可哉況有將軍爲之統領何憂功不成奢效忠兵已先調五千須及布種之時使蠻奔命得剿則剿以分將來之力時不可失也其餘土司兵當調者幸早



平蠻錄 卷之十二  
知會惟令裹糧給折色甚好留神留神

四

將軍前所列大征事宜行議久矣而未有復者緣衆論知征之爲征而不知征之爲撫也又人各有見此區區日夜所焦思者因思

朝廷之上原許會同調度土漢官兵速將蠻賊盡行剿滅以靖地方又未盡事宜悉聽本院從長計處今將軍忠勇任事而又奉有前項

明旨卽不必再題今所題只調安國亨安智劉天慶一事耳其他固可徑處矣至於破格重賞破格超陞

本院俱以一身擔承萬萬不肯失信然須將軍多方鼓舞以全取勝爲妙今百萬銀兩已備而五十萬糧米難集非假一年調度決未易言區區之意一面處糧一面懸賞卽早費二三十萬銀兩充賞度可以成功則糧米且無所用矣將軍三思之大渡河兵五百名已行調矣惟寧番越雋兵方有事於邛部俟另調今所調奢効忠兵五千以將軍勦兵少爲慮因速行此以便就近施行餘不能一一俟面布何鈺進內作何動靜阿大阿二如無立功報効之心作何屢處亟欲聞之



五

兩獲手字慰甚大征之議久定豈俟今日惟是糧不預集運糧之策不預定卽得請亦莫敢動

帝王之兵以全取勝又貴謀賤戰將軍所熟者出巡敘州正欲計此非紙筆所能悉餘具公移中

六

天氣漸暄將軍經營於深箐茂林中殊勞苦都下諸老書來有謂此事只用將軍可了者有謂未宜騷動一省者今調兵疏已行矣其言頗婉婉則廟堂始從之不然則駭矣

新主卽位海內宴然他無議大征者而獨此議之故宜斟酌昨先調奢効忠兵五千如到將軍可以全力攻凌霄城而令郭總兵張叅將相爲犄角將軍又應援之卽無不破者破此城卽各寨膽寒可次第圖之矣大渡河兵五百名月盡可到幸預定地方今馬湖事寧又行調寧越兵伍百名以新任守備沈茂統之其人起自布衣儘似可用在將軍用之耳初夏可到敘南庶得回相計議以圖勝算各隘提督官俱能盡心無欺玩侵剝者否須賞罰一二人乃可以肅軍令賞勸之需有當用者據實移文以憑議發成大事者



不計小費將軍雖巧婦豈能煮無米之粥哉天日在上若得蕩定此蠻除六縣生靈之害何必更避嫌疑亮之亮之

七

將軍閩中之事余所不知惟是鎮守敘南以來劄隘練兵倦倦以大征爲念蠻旣稍知歛跡而六縣之民盡倚爲重余一入蜀得之縉紳先生父老子弟衆口一詞因未抵會城卽揭報政府及本兵若曰都蠻之患極矣罪在不赦而不佞入境以來諮採輿論僉謂不可一日無劉將軍今例當自陳願假

朝廷一字獎留以作其勇敢任事之氣此余爲地方愚慮非能預見爲將軍地也乃者李諫議舉將軍閩事疏劾之甚重具在客中而政府本兵乃徒據余前揭以留將軍致蒙

朝廷俯從曲貸徃過責以新功恩德甚厚不知將軍當何以報

朝廷令政府本兵有詞於議留而爲余逃妄言之罪也今日四川疲敝百姓凋殘非獨都蠻故也寔向來諸將玩寇養亂徒張大其虛聲而絕無痛癢切身之實念日夜圖維多方以制蠻命者今將軍固能解此



意余重有賴焉而又所遇若此奈何若將軍不卽思  
改圖取左右今昔誤事者重繩絕之以自暴白因乃  
誓血誠且夕平蠻以救東隅之失恐機會難再得也  
余寔不能爲將軍後日計惟奮然三思

八

昨遠勞殊慢然得一細論機且以便剿賊良爲慰也  
昨見武生李之實所持將軍計誘阿苟硃票可謂良  
工獨苦乃將軍若有而不居者豈謂更有奇計後着  
乎甚喜甚喜冒雨遄征想已達珙縣每事從長商議  
鄙人樂觀厥成耳何幸何幸翰札取天全兵此調遣

大事也非移文用印不可昨已懇切面告豈將軍輒  
忘之乎留意留意部下各色員役須寬其舊過責以  
新功自

朝廷待臣下莫不皆然所以人人思奮惟將軍多方  
鼓舞之卽讐亦可用要在利

國家安民庶耳漫及不備

九

聞奢効忠兵將到須預授方略先劄營而後相機夾  
剿區畫既定有着落乃可勞干旄出而議大舉之事  
今日有人自京來相公甚爲地方留意又謂本院必



知劉將軍之深乃保之蓋翹首望捷音也不盡不盡

十

將軍氣吞九絲何有於凌霄想旦夕破矣且連日天  
雨恐不便攻擊我衆彼寡我強彼弱用間設奇蠻當  
自潰美既破之後當即圍九絲仍須分付奢効忠不  
破九絲城不算彼功也天全兵已遣官同原差往調  
惟安智兵須少候

明旨耳將軍屢立戰功平日忠勇甚著即近日一鎮  
敘南逃亡盡復田野盡闢百姓尸而祝之何等大功  
此功成後保為將軍闡揚雖不能文不敢辭也豈似

周將軍身後始有聞哉出入起居之間宜用有知識  
伶俐之人多置左右未可以單騎自恃蜂虿有毒惟  
將軍念之

十一

差官李獻忠到見蔡中丞書知劉天慶不得來矣皆  
是

朝廷地方皆是大家責任若調後貴州萬一有事彼  
將有詞以借口故鄙意亦不欲其來既有名將在此  
文武齊心調兵四集何必拘拘於天慶之三百兵哉  
又安智兵萬萬不可調前差人可作速追回緣將軍



向日傳牌貴州尚以爲言若不奉明旨先調卽貴州指此說話不徒無益而反有損矣幸三思之四鄉中聞儘有不同反者切須招來指其生路惟留意

十二

兵無定形大舉在秋一定之策也此時青黃不接蠻無搶掠若圍困之久必有絕糧之寒糧旣絕必并食於有糧者不久必有內變而又晝夜設疑設伏募敢死之士數十人或放火或劫寨或放銃或鳴鑼使之神驚魂亂此勝於十萬之兵也切不可失此機會又

作速召募土兵爲至緊緣六縣生靈莫不憤恨欲食蠻之肉而椎其髓者與調到土兵痛癢無關者不同不可不乘其憤恨收用之計旬日間必可募萬餘人以原兵一萬守隘以募兵一萬出奇將軍以爲如何恐患言不可不聽也若一月之內成一奇功我且先具一疏爲將軍報功本院伏枕而思臨食而慮今日之事非將軍決無可成功之理非本院誰能知將軍所謂兩不可負第不容一日放過蠻使得安寧也千萬熟念至祝至祝

十三



平遠錄 卷之十三  
千旄已駐長寧卽日計破凌霄暫且凱歌而出鄙人  
已治蒲酒俟之江干佳節且臨山間岑寂聊徃薄意  
以勞左右惟笑而留之

十四

聞將軍匹馬走長寧壯哉卽凌霄旦夕破不俟占卜  
矣始以片紙擒阿苟今以匹馬破凌霄孰謂劉將軍  
勇而少謀哉此功成幸星馳見報卽思第二妙着付  
奢兵跽足以俟

十五

此時只以用人爲急以招兵爲急無他務也若糧餉

則本院任之矣將軍可不必慮來翰中三可慮者固  
是以愚見論之似不然若凌霄餘黨散漫正好奪其  
空城劄兵據之以圖進取一不必慮也兵若進攻委  
爲下策只須晝圍夜驚左埋右伏不出十日餘黨疲  
困必尋走路伏起或殺或擒彼命在我二不必慮也  
連日雷雨溪水泛漲我兵雖不能前却亦可乘其不  
備若募敢死之人趨水大衝劫放火舉銃彼怕自救  
不暇三不必慮也至於發疑兵使蠻各自顧甚妙要  
之機宜在彼中想高明自有成算難遙度也募兵定  
以五萬爲率不得五必得三練而精之何堅不破惟



平糶錄 卷之十一 九  
將軍留神事少定方勞出來一會餘不能一一火器  
最要緊議造爲祝

十六

近日又有人自京中齎報來謂閩人恨將軍太甚也  
昨見部議行勘科中闕然不平又要上疏約見閣下  
閣下止之曰且待四川信來如何再劾未晚然則將  
軍其危哉有書可證他日當覽之將軍且不必出來  
相見趣京中委官在此多設方略鼓舞人心出奇制  
勝或擒或斬若得首惡及負固者數十人破得數大  
寨來報劄兵爲隘守之庶本院有所憑據特疏奏報

此將軍轉罪爲功去危卽安之要策也大抵用謀爲  
上用兵次之以蠻攻蠻爲上以兵攻蠻次之若徒憤  
激於血氣不審事機不量彼已僥倖一戰之間而或  
有損失則將軍寧可無功不可復有此罪矣前次賞  
功銀今徑解將軍用之庶不掣肘重賞之下必有勇  
夫仍須將軍親賞不可落左右之手或有侵尅怨在  
將軍矣爾我一體因吐肝膽告之名色把總黃希忠  
頗諳蠻情其言鑿鑿可用昨遣爲將軍用宜委心任  
之此人十倍何鈺蓋鈺乃柔奸詭詐小人言多反覆  
心多閃灼如云彼欲請兵攻某寨劉將軍不用其言



此對本院及該府言者如云彼要擒斬數蠻來獻恐本院遽以爲功而中止貽彼後患此對該道及該府言者本院面詰之曰你本不能畫一計得一蠻却且怕我中止何欺心之甚彼方閉口羞慚如云可請一牌管領何恩及阿熊么等本院詰之曰你前領我一牌竟無下落今又要領我一牌乎彼又閉口羞慚昨本院且含容仍重賞銀牌十兩買紅布手帕銀二十兩今住府五日矣該府問他何以不進去幹事荅云劉將軍帶阿熊么等出來見過卽去又云阿熊么等有信與他叫待熊么出來一齊進去如此支吾搪塞

全如捕風捉影其人似可殺也勸將軍不可再爲所惑且如阿熊么屬蠻也每每交通勾引其罪甚於叛蠻一妻一妾皆阿花之妹彼若真降何不協同阿花等攻打數大寨擒斬百數十有名直蠻來獻本院豈吝千金之賞乎今不能爲此只口說來降以爲緩兵之計此愚弄本院與將軍乃向來熟套故能兵退之後彼之劫害生民猶昔也是本院與將軍皆墮此狗首蠢計而何鈺恰似爲熊么等作說客暗爲蠻黨矣可歎可恨吳繼祖葛瓊如何此將軍所舉用人也何不於此時令之出力分投剿賊孰非將軍之功乎此



外有可用者須傾心用之兵可助者助之猶本院之  
傾心於將軍人未効而先具揭帖請以決留人既効  
而速調兵餉助之贖過將軍豈以我爲不然乎人有  
謂將軍功名已極正要効回了事本院知將軍決無  
此心何也若効回果得了事可也恐未能了事或國  
典森嚴一日驚恐骨肉之間後悔何及故知決無此  
心此忌將軍不欲成功者之言也卽相見其言不過  
如此此外有奢効忠兵於十五日起程如到須操縱  
之使有實濟乃可若糧餉則已陸續處分可足八萬  
兵一年之費矣千萬將軍以余言在意

十七

連日病瀉甚弱閉門調養未免戎務驚心所恃老將  
當此立功之秋計必出萬全以爲慰耳覆勘之疏附  
覽中間詞語抑揚對

君之體當然其在將軍亦可因之而自効矣今日之  
事因凌霄之勝而招降策之善者也但以愚見論之  
不必費講只阿大阿二阿花三蠻肯領妻子出來投  
降將妻子安置別縣此卽二鄉之生路無一毫可疑  
矣如三蠻不出尚在雞冠嶺劄寨只用小蠻虛降此  
便是陽順陰逆卽當明白與他說破只招安四鄉專



誅二鄉尤易爲力此乃懸斷却不知彼中事勢機會如何此不可不早決策勿徒爲狡賊延哄也何鈺亦當以此示知病中日夜以爲念者

十八

都都寨之難不特凌霄將軍躬冒矢石奮勇先登以倡士卒摧堅拔銳於積雨鬱蒸之天可不謂謀勇具備矯矯虎臣哉卽日破九絲當勢無全牛惟所排割矣來使道將軍意氣甚盛部曲無不感動爲人臣子報

君父正當若此矣鄙人何幸因得借手以塞責乎將軍勦哉掘井九仞而不及泉猶爲棄井也稍稍飲食自勞苦日夜圖後着以求全勝并戒軍士不可驕不可懈蠻竄入林箐者多早晚不可不備更得真降者千數百人給以免死印票庶他日好報朝廷也至祝至祝

十九

今日之事兵力未齊委當持重所慮隴兵不能耐久耳可以大功大利激之所謂大功者叫他屯兵稍待就了九絲之事此大功也平了九絲復官重賞在各土兵之上此大利也其胡藻等俱宜以此諭之此外



仍以時給糧間行賞犒若隴兵再住得一月各兵必齊矣然後可放心舉事也前日將大功解去不知竟作何處他果知感激否欲聞之酉陽兵五月二十八方起身此月初六日已有三百六十名到巴縣陸路難走俱從水路旬日之間當陸續可到天全兵此月十一日起身各州縣俱備有船簿等候順流而下卽數日間亦可到惟是奢兵安聞亨智二酋相搆又去助之却甚可恨也此信還不的今恐訛傳已解牛酒行糧共五千兩去又遣官程希閔於今日早齋令旗令牌同曹希彬催調不知希彬已去否須速遣

之其隴兵如果能剗定却緩緩收實來降之心以俟兵齊大舉此方得策賤體近日全好了想天地鬼神亦默祐也新召兵六千有餘須要分布明白務有實用方是至祝至祝

二十

來翰此心稍慰略分爲數條以相商確中有可便宜行者卽速行之惟留神是祝兵道揭來具答如左將軍可留意覽之

一投降一節乃是用兵本意原無盡殺之理但只要實心降後日就收做良百姓何苦殺他叫蠻莫疑



一蠻果實心投降便差的當官一員用通老隨去寨上住着叫他綁有名蠻賊出獻并送牛米赴鎮享軍一面立功報効

一都都寨蠻稱說九戶口有五戶口已投鎮雄府去了此當跟究下落果通同黨護而容其投乎抑詐容其投而別有深意乎又或非實有此事也如詐容之便是不然隴兵安可用而不早爲之所也

一觀隴兵裸獠等攻寨又似無他意其五戶口既投見在何處安置且如容都都寨投降隴兵又作何調度

一今日之事須待兵齊外面劄定連珠營又用偏師精銳占劄九絲城上大勢既定蠻之生死在我然後降者降殺者殺方可惟意所向此時兵寡斷不可執一不思後着也

一都都寨明說某寨某蠻殺人無厭若機會可乘何不就下手殺人無厭之蠻乎

二十一

監軍道云都都寨有情願投降之語又要黎朝佩進寨而深怨金羅此中正有機會可圖將軍何以處之兵固不可輕亦不可老聞調奢兵及到在半月外矣



又奢兵能久住以了九絲城乎若不久住能不待各兵調齊而自了之乎幸熟思審處之事須預定乃可此大關節也今差程希閔同曹希彬去調並牛酒行糧速發夫兵無定形雖謀勇俱備可無慮止恐龐兵難耐久耳奈何

二十二

連日大雨如注卽外間蒸濕不可言况營中乎此心甚懸念聞將軍此舉持重不肯輕發甚是甚是兵力委少酉陽兵旬日內方到已累次星火催促矣待其到時以鎮雄兵敵其前以酉陽兵間道掣其後仍令

張叅將并沈茂二枝分設疑兵雖四鄉併力無能爲也不然以孤軍專敵四鄉萬萬不可且四鄉旣敢抗官兵如此卽不必再去招降惟取便宜行事可也軍中下情須多方延訪多方探聽前聞何恩說只要三千兵就可破都都寨太說得易了試一問之更有何計擇而用之如不可用亦不必恠彼也今除守隘兵一萬之外實有新舊兵若干榮縣僧兵八百可卽調用否聞龐清兵無甚紀律奈何餘惟求萬全是祝

二十三

軍中之事一惟將軍是賴無可慮者都都寨想已成



平定錄 卷之十一 十一  
功連日夢兆甚吉招降一節若用阿大等去招四鄉  
尤爲妙計招得此來甚好如不肯來然後大兵攻之  
彼既無辭我心亦安矣何恩等湏重用之想不佞言  
賤體已平復此時惟靜以攝之差官調烏撒兵聞此  
兵自鎮雄地方出爲近又恐隴清以爲不便今命李  
獻忠來可喚隴清理諭之許他差一重職官到鎮雄  
坐鎮將軍官有可差者就便差之本院當給旗牌也  
此要緊者又調効忠兵係三萬本院門下無可差之  
官將軍亦爲我擇一人來如何今取瀘州掌印指揮  
滕光國不知可否可連夜發原役來立候立候

二十四

都都寨之破可謂鏖戰聞周于德等捨命直前非將  
軍忠勇所激恩惠所結豈能如此又聞標下舊日得  
力之人多被損傷殊可傷悼可將衝鋒并損傷者速  
開名知會監紀二道呈來以憑賞恤各蠻如尚聚各  
寨似且不必驚他只差黎朝佩等招降以安之待兵  
齊另作計較若逼急遠散逃躲後日又費力思之思  
之天全兵今日已到敘州西陽兵明日可到瀘州其  
奢効忠兵又經催發美外邸報馳覽  
聖旨責成院鎮更復何辭但有滅賊而已所獲都都



寨各穀米牛畜噐甲及田地茶園若干不可不查實  
開報至祝至祝餘不一一

二十五

守備吳憲送到營中二十七日書知得居十二蠻畏  
死出降內阿料有義氣欲立他作寨主擗劄弔猴山  
一處仍給冠裳要得差官速送以便行事本院聞之  
色喜天地好生

朝廷肆赦蠻來降適獲我心此將軍威靈所及也甚  
好甚好除亟行齎送冠裳外更有可商量者惟將軍  
聽之前者若不許降終是缺典今丁寧曉諭歷三四

月之久不見來降本院已決意盡誅之矣不意又來  
投降此非勢窮力蹙而後降乎此十二蠻者且不論  
真偽俱當容之但不知肯送妻子質當否須質當乃  
有憑據此一件要緊者又不知願獻首惡首惡的係  
何蠻須先承認開述姓名甘結乃許之此二件要緊  
者殺賊報功係何寨之賊先斷過不許將擄去漢人  
欺抵此三件要緊者依此三件即容之矣但云此一  
鄉有寨主四鄉俱來効順此當斟酌若四鄉俱來効  
順即九絲無叛蠻矣又何以云破之不難且如四鄉  
俱降矣能保兵退之後不復反乎封齊王云云知將



平續金 卷之十二  
軍有成算不必慮者但愚見投降者即時容之不降者即時誅之豈不善惡分明兵難遙度此在將軍臨機應變以求萬全耳又弔猴山一處地勢若何若係險要還不可許之餘不能一一

二十六

昨草草具報未盡今再申之弔猴山既四達之地容降蠻割寨此善策也又令拏本上有名賊首尤中肯綮惟招四鄉之說則有先後不同當兵糧未集之時宜招之以散其黨今兵糧既集不必招矣但畏死來降者受之不畏死不來降者誅之不得便則圍而困

之只有此三件耳今以將軍勇冠三軍又擁十萬之衆蠻之生死在其掌握中或正或奇惟所用耳豈復有所慮乎今所慮者恐別有逃走之路網漏巨賊耳區區引領企足而望毋能爲助也以數月之間建千古之業羣力羣策俱已舉用惟將軍勉之

二十七

尹從壽差往平夷二司魏宗暘取來驗發俱如來字矣奢効忠兵已報初四日起身其志頗銳酉陽兵五千初一日過江安同天全兵想陸續到蠻非人類急則投降緩則出劫請思長久之計今日大征非往前



平續錄 卷之十二 十九  
可比因有將軍名將所以廟堂委心若他人爲將本院決不敢擔承此事所以不可草草了事惟將軍孰計之受降旗不肯輕發有理有理緣他前不肯降今始來降又不質當妻子如何信得過所苦連日大雨如注軍士辛苦當奈何寢食念之計旬日之間兵力可齊有不遵約束者將軍徑以軍法從事麥易營用張叅將得策得策

二十八

近見各將官甚不曉事本院心切恠之無惑於將軍之不平也又聞指揮鄧三錫稱本院委官不迎將軍此大可咲三錫乃將軍原定委者手本可查本院因將軍所定而遣之非徑委也如何這等膽大卽是徑委豈該如此何不遂細打以快我心而乃含忍不究耶雖然此皆本院號令未分明之過也若體統名分已陸續爲將軍正之矣幸夙夜努力滅賊

二十九

効忠兵已議定麥易今彼自稱又劄毛壩其故何也如此則誰當麥易殊可怪也此等軍機豈容那動此必將軍另有指授或他人不知但鄙心切切欲聞也安帥自帶有兵一營三五日間可到郭帥兵已添撥



平定縣志卷之十一  
否各營想此時安排已定幸一寄之是祝餘惟鼓舞  
三軍刻期平定是望

三十

不移時間兩得來字為慰鄙人入山之行早晚未定  
亦待將軍商量停當乃進也各棍徒各通老之攪亂  
委可痛恨今牌行嚴禁矣何子宸尤為可恨容處之  
招募新兵委當查點今後眾兵既到將軍還須出一  
軍令詳悉曉諭違者重處方是酉陽兵七千名今日  
四百名來見其餘俱從江安徑進矣天全兵一千二  
百名亦於今日起身進山各賞犒等項即今解進委  
難為將軍措處知之知之本院所慮者蠻或遠去逃  
避若只在九絲左近可無慮矣毋猪寨之舉且緩此  
如何待永寧兵到圍住九絲而後了此庶不致再漏  
網如何

三十一

近日如單騎下營分定天全酉陽之兵有屬夷入九  
絲者詐以遣使內應携其志有點蠻假何鈺書者發  
誓大怒以安其心此皆古名將之所難者而將軍能  
臨機應變於倉卒之間誰謂劉將軍勇而少謀哉敬  
服敬服兵力齊矣所憂天不晴耳昨日雨即竭誠祈



平定錄 卷之十一  
禱今早忽已開霽乃知天欲滅此蠻矣都司徐仁威  
雖西北將入虜地將二十年乃梟將也所領家丁二  
十餘名亦勇悍今恐不習地利不便於攻而便於守  
令其補劄毛壩營而以資陽萬縣兵一千名使領之  
專防蠻衛突而出未知是否若沈茂吳憲還當留爲  
左右翼以便夾攻不可令之孤遠惟在商量亦不可  
執一聞江安扞子手不堪已將五百名換守隘壯兵  
甚善此外尚有不堪者卽當派令運糧兵卽夫夫卽  
兵此用兵之常也其餘鼓舞土官預行勸賞各解有  
錢糧在營惟與監軍督糧就便議而行之以圖早早  
掃蕩又如可受降不可招降四面連營劄定然後可  
用間出奇方保無奔散之弊俱望留心聞此時已有  
遠避而去者此急宜踪跡查訪之黎朝佩如不可用  
卽便以數字付他來回話至祝至祝

三十二

宋震來承手教具悉降蠻既有端的元戎已進黑帽  
尖山但當刻期進剿耳大抵今日之事萬全之勢在  
我天人協應無往不利似不必拘拘於時日蓋日日  
時時俱利也奢兵不耐久而酉陽各兵已住多時頗  
聞思奮之心甚亟宜因其奮而用之阿大羅萬良果



平蠻錄 卷之十一  
能報効生擒阿二方三等不服之蠻定將各蠻田地分賞他方見叛與不叛之報近卜一卦有猴尾雞頭大利之說正指七八月之交遲則老師費財矣洗耳翹足以俟捷音不盡不盡

三十三

此後着着叫將軍麾下其勿忘此言乎隴清何日到兵當作何用用後更作何處願聞願聞所云四鄉求降就計用計甚妙若四鄉能擒賊立功贖罪此是第一着美然非何鈺之力亦不能激四鄉如此惟四鄉來降先一着方下得有力此時方見將軍爲名將服之服之若四鄉立功我兵不可不助之此又要緊所云貴州慳吝一節有理有理鄙心良慰外隴清稱慶金已死真否密一查之如何不盡不盡

三十四

有自山中來者道將軍勇猛奮發氣欲吞蠻各漢土官兵帖然聽令毋敢譁者於此乃見雄略矣今日之事先收各寨之心以散其勢惟專力九絲以取全功甚有次第黎朝佩尚未引羅萬良出來若引出決重賞而用之不肯失信於降蠻卽不來或縣官亦知此意不肯遽擒也臨陣之時所重多獲首惡欲使後日



不復反全在今日着力惟將軍圖之昨分石砬兵乃出遙度幸勿相拘再從便分撥可也聞奢効忠志甚銳果否可獎勵之仍丁祝張叅將用心駕馭及防範都蠻暗買把目此要緊者又聞冉維屏亦有志可喜毛壩不用劄兵想自有見區區惟洗耳以聽凱歌

三十五

承來字已悉妙算此所謂持重之兵萬無一失者甚好隴酋請官坐鎮此詐也彼與奢酋不同奢所忌在安酋以其屬貴州也烏撒卽我兵方在被調敢爲掣肘乎將軍差官鎮之不妨黃希忠述默處二鄉者甚悉殊爲放心若早令二鄉與四鄉先且離殺策之上者也糧餉二事便宜行之此中星火催發擔馬如來意矣不一不一

三十六

昨解到老小蠻十一名且多被擄者未見首惡委爲緩兵之計其阿大旣真心降便當真心託之決不殺他今已行給免死牌並重賞矣此可以觀何鉅之功叫他益要用心若阿大能將九絲城惡蠻一一設法拏了獻功土官就與他做功大罪小了再莫要聽人哄他自失此好機會將軍議處都都寨賞功甚合天



理當人心隴清蠹首乃敢胡說細打差人極有道理其羅萬良等若肯到府出降亦俱饒了他還與重賞朝廷用兵只殺不服的不殺服的我等要體此意連日在府求晴屢屢夢見真武神當空出現祥雲環擁占者謂大勝之兆也彼中事有將軍鄙人無所慮焉綿襖綿被等催發矣

三十七

効忠初志甚勇可佳陞官重賞已題奉明旨本院所不吝也比以麥易營付伊亦能自任今兵到若干時矣尚不割麥易營統兵三萬尚爾猶豫

豈非怪事今所續添之兵據道議准其一萬是矣但待到益遲不反爲蠻咲乎如今割兵不動任蠻搶官及公行逃避効忠平日志氣何在諸將行事如彼本院所不敢知今將入營行糧已行守道催發臨陣懸賞銀牌已行催解若再遲延或事難就緒幸明言見報以俟處分餘不能一一

三十八

董思明之事甚爲可恨可惱此時外雖不必張皇內不可不多方處置或差通老曉諭急早送出免其死罪此上策也或卽厚賞通老令其換出此中策也或



平定縣志 卷之十三  
令降羅羅萬良引之出降併令思明就近坐寨而徐  
爲之處此下策也但今不知思明下落料無別事只  
恐搶上九絲城計安所出未運糧之先自當分布防  
護今糧未運城未攻先搶一官去柰何張叅將塊然  
無爲罪之魁也今日只當早早進兵以成神速之捷  
不得遲疑生變徒費錢糧惟將軍圖之

三十九

聞安總帥到矣決當分在毛壩一以防賊奔潰一以  
護送糧運就將所帶兵領之如別有分派則吳憲沈  
茂之類決要專遣一員或馬湖或石碛兵五百領之  
以護送麥易方可善後目前運夫已驚散尚可不深  
慮乎

四十

聞叛賊方三以獻董思明爲計而將軍叱拒之甚爲  
有見甚爲有見不然豈爲此一官而落其奸計乎非  
老將誰能及此服之服之連日零雨度日如年想將  
軍同之今幸大晴霽矣必已渡河而營其奢兵已另  
處衝鋒懸賞解去令其進劄麥易添兵一面調到別  
用不可專待進攻也想有嚴令促之但今所慮者麥  
易得窵一帶甚爲空曠險阻止張叅將一人領土兵



一枝果足以當之乎決不可不深慮也除已行安帥到卽割得空領奢兵一萬然聞安勇將也必用副將一員若徐趙侯不熟地理不放心用之良是至於韓似甫自小爲瀘州人又舊掌瀘州衛印今當立功時其伶俐任事又儘可用以此將副之豈不放心且他人獻一策將軍尚用之區區一得之愚當此緊急之際俯而從之奚不可乎若有失本院自當不以累將軍也可留此爲證此外再撥的當指揮如朱願等四員協同知縣陳嘉言楊汝栴支糧散賞且得相倚在營料必無失事必無不放心者此至祝也此至祝也

餘不能一一惟刻期奮勇一鼓登城不勝寤寐翹首跼足不多談

四十一

九絲以前之營有主將布置雖雞冠嶺母猪寨當防已將石砮續到之兵行監軍道留劄以爲外衛可無慮矣惟是九絲以後如張叅將奢酋一帶甚有可慮且如奢酋獨爲一營更無別將協同却令一二文官在營收放及至進兵之際誰爲護守萬一有失如董思明事非主將之所當急爲審處者乎將軍前屢言毛壩不必劄營又畫圖來看以明其無害今張叅將



却劄在毛壩不動又何說乎安帥若來以愚見當付之得窵而以韓似甫副之昨將軍又言安帥劄麥易如此則竟以誰劄得窵又非主將之所當急為審處者乎大抵此一帶布置恐將軍還當留一片心方保全勝不然顧前不顧後雖罪張叅將無益也卽今委官不敢入營錢糧全無交割一任奢兵頭目支領縱無文職豈可無武職一人乎此等事要不掛心如何做得况成功期在旦夕而踈漏如此恐此功似難成也容同知羅知州亦不進營何也果營中不必用便當出來不然豈容在外

四十二

連日天色大晴此鬼神助將軍成大功也昨日夜地震五六次二次頗大占者謂必勝之兆但防蠻驚恐而主將左右尤宜謹備特以奉告奢効忠差人稟略晴就劄麥易已遣官獎諭之矣惟留心覽之

四十三

昨見吳繼祖差人報生擒一蠻因知是日攻城如奢効忠等並不見一人不發一矢如此蠻得登城蠻若逃走亦無人攔阻矣所係豈是細事又恐將軍另有密計不可遙度今寫牌一面封着與將軍商量如輪



平蠻錄 卷之十三  
日攻爲便則此牌不必發如不便可傳示此牌仍舊  
合攻惟以助將軍一臂耳餘則來官具道不一

四十四

破城後用功次第想將軍自有成算必爲長久之計  
且乘此破竹之勢疾雷不及掩耳必再收全功以絕  
永患但千百年方有此一次今日若再丟下前件孤  
負大舉孤負此心必貽後悔惟再三審度急切施行  
若過數日軍心難復忍耐矣至祝至祝

重刻確菴曾先生西蜀平蠻全錄卷之十二

重刻確菴曾先生西蜀平蠻全錄卷之十三

翰牘

閩外筆籌

與劉將軍四十五

聞將軍止容同知羅知州不進營有之乎今頗有借  
口者謂王帥且不敢擔當如此委官如何敢進營因  
而各生驚畏此甚可咲可怪也若果錢糧不致錯亂  
收支不致遺漏委官不進營有何不可但恐土官處  
無管錢糧者給散不均所係不小然文官進營若無  
得力武官分領二三百漢兵相伴亦無怪其不敢進  
矣此一節已三祝將軍矣我兩人俱是船上把舵者



不得不常常叫號耐心聽之留心處之蠻子覺得困  
急者何日可攻上城懸望懸望

四十六

連日聞臨城督戰營壘相連蠻命在掌握中矣我兵  
多彼蠻少又聞每日出一枝挑戰或設伏或出奇使  
疲於奔命甚好甚好彼之標梭滾木擂石既盡便可  
合圍成擒矣將軍勞苦哉又聞有放一角走鎮雄之  
說此雖圍師必缺却不可拘泥一容其走必難再尋  
况鎮雄兵軟弱豈能一一擒獲後日追要不得徒貽  
悔耳

四十七

觀奸細之言向來用力俱中肯綮矣良工心獨苦豈  
特此一事爲然今日既示以誠心當必無竊肆之慮  
即或有之外衛之兵如石砧續到及零星湊到者亦  
足以遏其初心矣隴酋兵幸未阻回且與將軍計之  
耳不然果中其奸可見一己之知識有限也感感到  
則須分派緊要處俾有責成近日聞將軍事無大小  
皆身先爲之形體頗減豈可不加樽節况破城之後  
還有許多經略幸加將息可也李兵道亦如此言皆  
同功一體之心且專功運籌母親細事爲祝其餘漢



平定縣志 卷之十三  
土官兵亦多勞苦疾病及有打陣被傷者傳令厚加  
優恤但設法多哄下梭杆長標播石滾木即可併力  
登城矣望之望之

四十八

九絲城之變雖極多不過一萬我兵十萬劄圍久而  
不動雖是困法但恐人心或懈天氣不齊致有疎虞  
及生疾病不可不深慮也今日之事當以衝上九絲  
爲第一功重加懸賞其餘雖斬獲功級不能上城只  
照常論賞須以此意宣示軍中務令知悉庶免推挨  
不進俟隙奪功反悞大事此最要緊一節若說破各  
營小心腸舊病痛省力十倍

四十九

隴酋可恨之甚說來不來致我兵坐待以靡糧餉全  
似替都蠻設計可恨也又聞郭帥專待酋到方移營  
悞事悞事將軍於此等處着實主張或可以不待隴  
酋徑自行事如何安帥又到矣天又晴霽望之望之  
聞阿二要出降令綁送方三來方准之如何

五十

聞戎縣儘有路可通九絲城上更無妨礙此路蠻既  
可下兵亦可上縱未可上不可不加隄防隴酋至今



平蠻錄 卷之十三  
不到虛閃我兵前日不用他還是今必欲待之恐悞事多矣奈何奈何西陽兵打柴如何不先設備其被傷之多宜矣聞城上有瘦牛二三千隻蠻以此誘兵再須申令

五十一

征蠻之事區區與將軍共肩重擔人言不得而間之也或因人言而有所聞於將軍者則以人言亦有當從處故曰狂夫之言聖人擇焉非遽以人言爲是也在我等善用之耳聞將軍晝夜勞心焦思往來營壘間甚苦恨不能躬爲問慰其每每催迫者則亦甚不得已也今提兵拾餘萬所費錢糧無限圍城一月不見動靜本上賊首尚未得獲一人誠恐雷大雨小難報

朝廷耳以十餘萬之兵尚不敢動手必如何而後動手乎兵有正有竒今連珠劄管合攻乃正兵矣不知將軍何以爲可豈果無竒可用乎今聞阿二又入阿大之寨矣官兵圍守何處容此賊往來若無人乎殊可笑可嘆矣似此舉動將軍能保其必成乎可保則速圖之如不可保則亦請早早聲說另作處分毋使老師費財反貽蠻禍後日彼此之罪大矣本院日夜



思一進營又恐輕褻事體欲不進心急無聊使到即  
決詞爲我告焉天雨必有晴時一晴便可了事不多  
祝不多祝

五十二

今日之事何等重大擔子其焦勞辛苦萬狀不待問  
人而可知者是以心常念念雖屢屢催迫乃

朝廷公義不得不然其實非有惡意及聽他人讒言  
亂說也所苦天氣不晴有此逗遛奈何奈何蠻之滾  
木擂石甚多此須設計募敢死士人重賞之令其乘  
夜或割斷繩索或虛生驚擾然後可圖若只待其放

盡恐蠻復有路搬運木石將何日可了從來兩兵對  
壘必要設間設疑設探間之則其心離疑之則其心  
懈探之則某處有備某處無備某處可攻某處不可  
攻然後可知未有舍此而直以正兵攻上攻不上又  
退是蠻逸而我勞矣奈何奈何各營俱有懸賞銀乃  
賞衝鋒者何不見有衝鋒之兵前奢効忠來稟選定  
五千衝鋒但要銀牌懸賞已經解銀牌五千面到張  
叅將處矣將軍出一令叫効忠若能先上便許他爲  
第一功即以牌賞五千人仍另給重賞彼豈有不用  
命者乎効忠一上衆兵繼之將軍之功莫大於此矣



平定錄 卷之十三 五  
豈外此再有神算乎銳氣久挫蠻心益逞甚為將軍不取也

五十三

今大兵圍定蠻必死矣若蠻知其死而以死守之宜其難破莫若差慣事通老五六人分投執招降牌上城明說只要阿二方三及某某首賊其餘許擒斬首賊獻功或許分投早降免遭一槩屠戮如此必人心搖惑不定或可乘機用計是在大將密思而迅發雖鬼神亦不能測可也却不可先露干係但與監軍計議勿令左右見之至祝至祝

五十四

接來揭收功只在旦夕喜不可支但有能攻上九絲城者即是主將之功不必問其出於何人也奢兵願輪日上攻亦是但既攻上城各兵須要以次隨上但有先後之分未有全不上之理此時一刻千金不可錯過以後天氣漸涼人心又是一樣不可不慮不可不慮連日翹首企足無任懸懸弄兵翻過鷄冠嶺擾害我縣百姓將軍聞否

五十五

將軍之功成矣始由叙南發跡終由叙南全名古來



平蠻錄 卷之十三  
名將罕有將軍其勉之必盡擒首惡必四面搜山必計處詐降此百世之功也萬萬不可歇手至祝至祝捷報一到本院即起身以踐登城之約磨崖勒石而後班師更無多祝

五十六

郭帥既劄尖鋒蠻已喪膽各兵宜乘勢齊上矣而今猶遲遲可怪也所慮我兵晝攻夜必困乏蠻知危迫乘夜逃走又如都都寨故事豈不廢時失事墮蠻詭計乎可每營輪兵一二枝晝則堅卧夜則伏路猶庶幾少有所獲不爲蠻欺又安總兵張叅將奢効忠豈得袖手旁觀乎何不聞奮勇攻上此時將令不可不嚴士氣不可不震萬勿怠緩至祝至祝

五十七

初一初二日將軍奮勇士卒用命可期必勝矣又遲遲至今者其故何也蠻若狗彘乃能抗敵如此可恨爲今之計必須出奇乃可破前欲令通老執牌上城一面招降隨後密以兵上即通老不令知之此亦一策也不知行否再遲則師益老氣益挫非區區之愚所能保也將軍能保之哉錢糧在營者及在各縣者有當重賞及懸賞者將軍須與該道徑自動支以鼓



舞士氣若此時不賞更待何時長疼不如短疼巧遲不如拙速兵家事甚可慮也連日不及通書恐亂將軍視聽柰久無捷音令人坐卧焦躁據道云方起敵臺甚好便須起堅固敵臺可以攻亦可以守其運竹木土石人役工匠須重賞之天氣漸寒無柰無柰有不用命者亦須梟示一二將軍不飲酒早晚強飯自愛一心向前不必多怒擬初九日起馬前進矣先此不備

五十八

連日以天雨難措手足想且養威畜銳以待之營中

傳言不一本院一切不聽且不足聽也將軍有傳言者亦不必聽之只一心幹大事成大功便是外覆本旨意報馳覽天氣頗寒早晚珍重不一

五十九

捷報至不勝忻慰非將軍忠勇沉毅安能成功如此之大且速

朝廷任將正宜得人如此矣所祝兵勝之後戒令將士勿驕速將雞冠嶺毋猪寨及水都平素慣惡與諸帥密切仔細商量一舉而盡得其要領此莫大建立莫大陰騰而區區因人成事亦分榮剖光不朽矣老



者幼者及婦女萬分傳諭勿殺至祝至祝外開原奏有名首惡及雖非奏聞亦係首惡者俱當逐一搜索

六十

將軍初安阿大阿二之心以通糧道衆人以為疑而將軍獨力任之今果通糧道而破九絲其策善矣除阿二已叛想已就擒外至於阿大不擒鷄冠嶺不破則九絲之禍猶在也將軍今復何以了之朝廷所以待有功者不薄惟慎終如始必出萬全方保全名垂光不朽矣惟此至祝他不盡言

六十一

阿大九絲第一渠魁也今猶雄據雞冠嶺上說降不降譬如下碁後一着極要緊者還不曾下如何放得手今日不許他再說降了只有剿而已如是真降叫他出來投見其次則水都收藏逃匿必要獻出來其次則母猪寨詐降助陣必要正罪惟此三節係千百年平定張本必不可已其餘則相機處治密議速行至祝至祝

六十二

九絲之破目前之功也處置詐降百世之功也有百世之功方有目前之功無百世之功則目前之功盡



平定錄 卷之十三  
棄想將軍長顧却慮自持勝算而默運之外人俱不能知然翹首以待又五日於此誠以乘勝之兵尤利於速不利於緩其中難盡言惟將軍急圖之

六十三

聞雞冠嶺又破此心慰矣但不知阿大巴擒否至於阿二方三不獲可但已乎又待何時方獲一了百了不得復貽後悔矣其他開去首惡獲者有幾是必留心又如落五落拘等處當作何處逃入水都者又作何處二十六日決起馬進山一登九絲庶得面議前後事宜若報捷事已大略具一疏馳奏矣功次之疏姑少緩之大功已到此千萬耐心至祝至祝

六十四

向以將軍約盪平九絲之後請區區登城張宴二日是以前今日之來又善後事宜最爲緊要處置不善負今日之奇功貽將來之後患且二三年間必留將軍經略停當乃得脫身是以設立衙門開通道路控扼險要招種田地非將軍赴時詳議其誰之責也若此等皆有下落區區進營與否又何所關係哉承差官遠接感感附此言謝尚候報音

六十五



九絲盪平將軍百世之奇功也再得阿大等俱獲即稱全美此外惟處置善後事宜爲緊要耳區區此來原與將軍約克破之後登城張宴大飲班師此亦古今快事今且駐慶符待將軍淨掃的信而後進至於處置善後事宜則老成長慮而却顧無過將軍矣十五歲立功名於此至六十歲而酬其志無餘恨焉可謂奇男子此中一定妙計又何用訪他人乎幸留心詳度而熟計區區將斟酌請行勿曰我已破九絲此外不干我事也大家俱

朝廷臣子受恩深厚難分彼此天雨連綿安得有數日之晴乎天蓬水都之舉已見公移中不多及獨夢想登九絲耳已備山轎頗便即乘馬何妨將軍久勞苦意亦欲少分之耳且使後來知盪平之後將軍爲九絲主人他日劉將軍傳中此爲第一義矣

### 六十六

昨悉各將分剿之情及奢酋巧爲應援之計果得事成亦姑不論矣第恐類盡餅耳各酋首所得已多但近日出名者惟阿大阿二方三爲最此三人不獲徒多何用不可不深慮也賊勢已窮若懸重賞必有能搜得者差官道雅意欲慎重九絲之行良爲有見但



鄙見欲一登九絲既各寒各夷之膽又得面計善後事宜庶不負此奇功而將軍之苦心極力未必不以此行而益成其始終之美若道路之險巇非余所計也十數萬官軍既可進而本院所隨從者僅二三百人或不當惜此一行其爲我熟思之天雨途泥且駐慶符以俟

六十七

快手來接手字具知苦心此將軍與本院所同也從古用兵委無盡殺之理譬如地上之草連根挖了來年還生只蓋了房屋在上讒不得生就傍邊生些也

不妨今日之事正類此若處置不得宜就殺絕了後日不免生出人來依舊是叛蠻若處置得宜如九絲城上凌霄都都雞冠嶺等所在作何設立衙門務相照應或設一府控治外割四縣內將何恩等立爲土千百戶等所即種蠻田俱屬於府仍設一叅將統之庶可永絕後患雖有餘黨不足慮矣此區區愚見幸與諸將速議務求萬全不負萬民尸祝之意本院且到珙縣駐馬以便會同大功已成只在後面處置一節勿忽勿忽至祝至祝

六十八



恭喜阿大已獲周于德之功大矣可嘉可嘉今齎銀牌十兩賞之於此見將軍善用用人而能得其死力矣其隨行者亦皆當敘錄此外惟阿二方三殺人太多必不可縱再須設法搜捕之不在兵多只在計妙如周于德獲阿大費幾多兵來得來全不費工夫正此之謂要人用心耳母猪等寨須及早下之土兵大半已散尚存虛名冒糧將軍加意節省者于此豈可不先行分別大抵九絲盪平將軍平生事業此爲大結局矣昔黔國公破雲南郡縣其地至今賴之其次如何總兵鎮松潘經畧甚備亦至今賴之何不乘此好

機會始終擔當或立所或立堡或立隘或脩道路或伐山林再費半年工夫地方安如磐石將軍然後優哉游哉或入總五府或告歸錦遊策名

天朝垂光不朽大丈夫分願足矣是必以鄙言爲據第一等事不可讓別人也諸將可鼓舞者鼓舞共成其事尤便且速舍此更無多祝不盡不盡

六十九

承教入山且緩外具公移惟留神阿二的在雞冠嶺方三阿享阿富阿厚阿花的在母猪寨將軍欲盡擒首惡并承認善後事此地方生靈之福



國家得大將如將軍不枉用人賢子賢孫世世封侯  
天必不負苦心人矣區區何幸何幸此是將軍平生  
大結局儘力幹得完全何必說趙充國郭子儀且此  
事必是將軍方幹得他人必難承認本院若是潦草  
了事之人亦不肯以此惓惓付將軍也相亮相體共  
成不朽之名更無多祝

七十

周于德到又見詳悉甚慰但正在攻母猪寨又妨他  
來也賊首期于盡獲甚是而阿二方三平日殺人獨  
多又方三當償董驛丞之命也善後事須待衆議停

當乃可施行原無在內設有司之說蓋欲建府於長  
珙之間以便控制而內設總鎮衙門及守禦所也賤  
體已全好數日間又坐卧不寧飲食甚少奈何奈何  
善醫我之病者非將軍其誰一場大功未可以此一  
寨損威名也日夜懸望日夜懸望有當懸賞與道議  
徑行土兵早散一日節省多矣周于德決當優敘陞  
官劉天慶不來如何也成此大功可嘆可嘆前欲加  
周于德等以冠帶渠等皆應曰已有了今隨將軍衝  
鋒破敵勞苦俱多今當何以優之不妨慨然見教

七十一



母猪寨既破各山箐逃匿之蠻或搜剿或因計招撫將軍與該道熟計速行外面人心說將軍以成功自滿不似初意之銳不肯慮久遠我知不然必能爲地方千百年計也母猪寨不可再遲至祝至祝

七十二

坑蠻寨或招或剿隨將軍處置不必固執若係良善非惟不可殺亦不必動兵若係叛蠻留在後日果否有患無患此將軍之責矣敘功一節易處知將軍有不得已處從來用兵或亦如此餘不能一一阿二獲否亟欲聞之

七十三

將軍成此大功非特滅寇又爲

朝廷開拓邊土得膏腴之地萬餘頃比之松潘尤不同也此時所係心者方三阿二不獲一也落武落拘乃奢酋自行招降如阿苟首惡妻子皆在其內竟無下落恐貽後害二也降蠻未有處分或先立一頭目管轄或分發各處以漸解散俱未見議來三也了此三件將軍之功近世所未有也惟留神早以信來至祝

七十四



據道揭將軍以後日之事盡付在身決保無虞區區不勝忻躍所謂漫散餘蠻急之則無獲緩之則有處在將軍必有一定之見如往日所以處阿大者方肯如此擔當其議定應撤應留官軍本院又安得遙制之也但有四款與將軍決斷者幸留神毋忽一撤兵之後雖有留戍萬餘所謂萬兵不如一將况蠻所素畏服者劉將軍也若但留戍兵而將軍不駐劄於內萬一有失本院決參論將軍功自功罪自罪不敢顧惜此一欵也

一黃土內官等處既稱可建衙門若不趁此時先建總鎮府以定漢夷觀望後日決然費力非惟百姓無主即我輩衆口生疑舊隘已無兵或官兵戍守不定爲害匪細若能遂建衙門有匈奴未滅無以家爲之志餘蠻自當喪膽因而分田任土以爲來歲住種根本豈不甚妙此二欵也

一各處剿賊虛費錢糧無處補報今蠻田膏腴所收子粒數倍於腹裡何不作速招人認種寓兵於農且耕且守以免外面轉輸以償近日供億此趙充國所不能得之於漢李德裕所不能得之於唐者而劉將軍一旦成無前之美事縱使年命有盡芳名豈有窮



乎極大好事不可錯過此三款也

一破寨百數十所擒斬蠻在四千之外僅得諸葛鼓數十面銅鍋一口將何以復

朝廷計其器物除標弩刀甲外須古器重貨多得件數奏報方見此功着落須不吝重賞購之獻之

朝廷藏之天府征蠻之功萬世不磨矣此四款也

七十五

元老一則懷留將軍不恤衆議二則書來示以當募死士從間道以擣其虛三則示以用竒乃勝四則示以六之人讐恨既深可因其機而使之五則示之

布置雖多成功一路不當以歲月取困凡此五策將軍皆一一遵依致有今日成功誠同爲

國家戮力而元老運籌帷幄之苦心至不可誣破賊之後將軍可有字託本兵一轉謝乎

七十六

九絲之功百世不磨非將軍誰能辦之近日有書去京稱羨不已豈能一一道總之爲

國家也昨書乃甚其詞以責成將軍善後其言雖直其意非不善亦爲

國家計也聞將軍大哭反失區區本意且千言之美



平蠻錄 卷之十三 七十七  
一言之直獨不能相亮乎我兩人擔當此事今日幸而完全豈肯更聽讒言勿過疑也又後當自見之如信讒言天日可鑒處置落武降蠻停當即出一見慰勞辛苦

七十七

前差官後再與司道商量經略地方各款係與將軍面議者本爲久遠之計即已奏報

朝廷不得輕爲改易前後矛盾相去之遠若只圖省費速成不免見小欲速恐非將軍任事之初心也須要從長擔當毋致後悔其餘應幹者一面會二道速

幹區區因條陳各疏薄體成病不能多言特此奉告

七十八

山中雪大將軍獨任經營良勞苦矣昨小疏中言之已備不再贅武寧城圖頗停當將軍所慮三件俱是但慮查盤一節未是耳大家爲地方幹長久之事豈是私家用度乎人心不死豈得妄加議論不知此城之外四角相近處可另議設四堡便軍民棲止與鎮城相照應否蓋堡小易完而又不失建大城之初議惟將軍圖之馬草坡起演武廳亦須高厚其牆多蓋房屋於內區區此等思慮雖爲地方亦爲將軍使後



世知將軍經略遠大不肯潦草了事如此也况善後之疏乃兩院三司會議而題如出題之人將軍乃作文章之人也如出題本大而文章做小了責將誰委乎後有執此問將軍何不依原題做其何以應恐不在查盤也如何如何周于德等何故擅離可謂孤負人心矣昨疏內已優敘其功更有何說就彼有罪成此大功亦當相准奈何舍將軍而去大抵小人只圖抽身自便不顧地方豈惟負我其負將軍甚矣如果要挾他就走入天涯海角豈能得脫可嘆可嘆一切軍匠地險工大全要犒賞鼓舞人心已行該道就近便宜行矣隘軍刁潑即禁諭之黃希忠已催赴將軍矣百惟耐心務爲千萬年計同報朝廷以垂不朽

### 與郭總兵

兩得來字此心稍慰今日之事惟兩將軍是托而將軍有必報之讐尤不必待人催逼須儘力殺賊而後無恨於心也不許殺降此一念天地鬼神鑒之矣即已嚴行禁諭但天氣大晴已五日寂然無信甚爲可慮奈何奈何

二



昨聞輪日攻打之說甚爲不便既分彼此即袖手旁觀任其成敗豈得專心一面拒我矣是何謀略畢竟要四面齊攻先上者爲第一而將軍與劉將軍爲至親又有必報之讐豈得不明言利害以期速成大捷而徒秦越相視也今日之事以兩將軍合而爲一尚猶艱難若此天下事豈復可言乎久不見將軍一字相通未知何意特此奉勸同心共濟成功之後本院登九絲城敘功以爲快馬功成二將軍俱享富貴如少有差錯彼此無能免者不可不深思也至祝王祝

三

勇哉郭將軍奪據尖峰已得地利狐鼠就烹將軍之功偉矣破城之後以精兵守之即乘勢四面搜山盡行擒馘將軍爲臣報

君爲子報親兩全忠孝矣勉之勉之勿以此自足勿以此自怠大捷報到本院即起馬必登城躬勞將士而後班師宴太平諸惟將軍悉心竭力以圖不朽朝廷有負將軍自有本院在也無多談

四

將軍奮勇先登聞之不勝喜躍計此時四面併力齊上蠻已就擒所祝益鼓將士盡數芟鋤勿使逃遁九



平蠻錄 卷之十三  
絲旣破分投搜山所謂破竹之勢也今日之事不得一毫姑息一毫怠緩若有不了前件亦將軍後日之苦若能了之他日作太平總兵豈不美哉無多祝無多祝

五

將軍不先登尖峯恐各兵未及遽奮此其功本院自知也將軍可以雪前人之恨矣忠哉孝哉斬草除根之說良是然貴在神速若復延遲便不濟事不見全美矣大家鼓舞玉成之毋忽

六

將軍之功本院自知之本院未嘗肯虧負一人也再不必言但今日用十二三萬兵費四五十萬錢糧而阿大阿二方三賊首俱香無踪跡諸將何顏面見本院乎

朝廷少年英明不可輕犯諸將不思設計擒斬首惡且來妬功爭功本院深爲諸將懼也霜降之後天氣益寒軍與夫恐難久待自破九絲之後於今十日矣不知所幹何事將軍擁兵不少何不奮忠勇早早決策乎隴首妄肆搗辯甚爲可怪假如把目與他爭功他心下如何且把目之功即酋長之功但在論功



者有斟酌耳今人人來爭成何體統大事已到九分  
九釐於此時不求全美豈有人心者乎特此激勵將  
軍  
朝廷若負用力之人本院寧罷官不做記之記之速  
馳信來

七

懸賞之銀縱分給未公本院自有補賞之處爲大將  
者不宜先起忿爭以惑士兵仍以好言曉諭士兵方  
是日後還要用人不肯使失均也但當以掃除潔靜  
爲志方爲忠孝將軍深念之

八

阿二方三之功已行道鎮爲將軍查審矣弔猴等寨  
不可不及早用計攻破此外善後事宜要緊將軍爲  
桑梓計是必盡力以求萬全總待

朝廷酬報不肯負也不肯負也有當相聞者陸續字  
來

九

將軍全忠孝立功名惟在今日尖峯之拔何其勇而  
毋猪寨之遲延何其怯也大抵九絲地方乃將軍他  
日擔子本鄉本土雖欲逃之而不可得是必用心至



祝至祝

十

將軍爲鄉土立奇功

朝廷報功之典以漸至矣不虛不虛羅萬良決當留  
之所謂世代流傳兇狠者另當有處一切機宜趁三  
道在裡可悉心商議外據府言將軍舊兵無處着落  
正好分種田地就作百姓但此須道中議來將軍不  
必沾惹庶無後議

與安總兵

將軍勇略本院所夙聞也九絲又係鎮守舊地蠻惡

已極特請

明旨勞將軍遠來協同掃蕩以圖永安非爲一時計  
也聞募死士千餘相隨甚善甚善即此見實心任事  
矣但師期甚迫惟兼程前進乃可濟事徑須入營凱  
旋相會不遠也

二

得渡瀘之信喜不可支緣數日間企足以待將軍至  
而後舉事也器械被甲等項已預運入營付委官相  
候有不足者令該府辦送有都司韓似甫頗伶俐自  
奮舊役麾下想所知也今委備羽翼此時惟麥易一



路最爲緊要劉將軍欲得將軍連營此路已相約否  
別紙先年之弊及今行奢効忠盡翦云云當次第計  
而行之俱萬全策也只見將軍爲地方久遠慮忻服  
忻服但酉陽等兵劄營已定難復那移且比畚効忠  
盡心竭力號令昇兵頗嚴必能依命行事可無手下  
回護事所祝星夜督兵進至麥易旦夕望捷報洒洒  
爲將軍賀焉

三

聞將軍犒師衛上即趨得空劄營兵俱臬隼可喜據  
劉將軍字來恐驚動降蠻渠曾以此意相聞否在將

軍還當一遣問分明應作何布置庶免後言或專劄  
得空或併力麥易不可不預定也近已攻打九絲想  
將軍營已移近必成犄角九絲旣破之後除一營劄  
定外其分投搜山砍箐之功儘多不可不在意奢効  
忠赤心報効此土官中出色者將軍舊常臨之可鼓  
舞用命餘惟慎重以圖萬全

四

蠻雖多男婦不過二萬守雖堅地寬必有空處梭標  
木石雖狠從古未有不持器之兵且我兵非空手搏  
戰者前奢効忠說有五千先鋒何不見出力若能先



上便以三萬兩賞之憑將軍持此爲証來字立柵豎樓可攻可守便當速爲聞劉郭二營已爲之將軍請先立先豎自當相効其應該賞勸動支銀兩可就近與該道徑行委官酌支降夷陽順陰叛此必不免但能拏着送糧助器械者便斬一人梟示亦足示警何故不聞爲今之計四面必須齊攻使蠻奔忙無措但有先攻上者即領重賞若効忠先上甚好或地形不便但能應援齊上破城之後他能搜山除害盡絕與先鋒之賞一般將軍可密示他知要他體本院之心決不肯負亦以此爲証其餘晝夜設計務在使蠻疲

困不支其第一節在約期四面齊攻不許先退有退者即斬則九絲無五日不破之理也惟將軍勿忽

五

將軍提兵一旅曾不旬日遂建奇功衆人皆稱服之但將軍初所言爲久遠計者正在今日決不可半途而廢可悉心與主將商量乘勝速爲遲則挫銳氣矣連日更不聞動靜甚爲懸心惟將軍勉之

六

聞奢効忠要結落武等處蠻心不肯用力處置有此事否將軍必知之况係原分信地不可忽也但恐効



忠無此他必待事完定有分明此乃効忠子孫甘結  
想自知之將軍若查訪有聞常常封報可也至祝至  
祝勿露勿露

七

將軍忠勇群下効力本院盡知之但得它乃分定地  
方今落武落拘奢効忠原任處置者及今無甘結到  
院不知竟作何狀一場大事只此地經略未定恐貽  
後害將軍與効忠責任不小張叅將管轄尤爲緊要  
可各示知毋貽後悔

八

都蠻積世之強寇也以將軍素著威名特疏借重今  
果成此膚功區區宜何以爲

朝廷爲地方謝也擬宴勞府城將軍又念苗民無統  
督之而回柰何善後數語尤見深慮若將軍之功應  
錄者不敢隱蔽但聽

朝廷處分耳

劄叅將胡大賓

各官俱似該叅用心本院省許多氣力矣王慎亦能  
任事者運道無阻運夫已足俱可無慮所可慮者戎  
長兩縣恐九絲城破後或有奔逸之賊而戎縣尤係



賊之根本即此時尚有交通其弊全在通老可乘機就計用之以探虛實但不可露或查通老中少有天理者安置身邊亦有用處此輩極奸巧會說不可被他謾哄後有天全兵到當通發該叅領用

二

來揭句句切當有理宜着實速行但事機甚密該叅可密與諸將一言本院至意並鼓舞軍夫人等務待搜山已畢方許聽令放回

重刻確菴曾先生西蜀平蠻全錄卷之十三

重刻確菴曾先生西蜀平蠻全錄卷之十四

紀載

論曰夫策府書績詩人歌功尚矣而征戰之勞勤記之尤其所勤篤云以故隆碣之建界柱之施豈惟增煥萬寶亦薄伐莅止嗟嗟厥功之惟艱也山都介川貴間其蹂躪爲患非一日矣公秉大征之議受雄戟以往嚴鼓未通阿大泥首顯顯令問以光 皇室之玄靈豈不茂哉敘紀載第五

西蜀平蜀碑



皇帝續萬年大曆服英明神武高頴百王亦越股肱  
之臣內慕帷幄翼宣丕烈洪稜所暨旃表辨髮  
之雄卉服雕題之長莫不遡風仰流攝聳請命  
維是都蠻蟠蜀徼上馮負嶮塞僑蹇自擅時時  
猖獗闖入內地燔赭我室宇屠剔我婦子並邊  
諸邑數蒙其虐惋痛入骨髓會

大中丞曾公以文武僊聖被命填撫我全蜀至  
之日搯腕歎曰今

上初政鴻明昭晰四方萬國罔不龔迺茲小醜俾爲  
蠱尾以螫吾吐時維疆臣之辜且蜀三面瀕夷

獷獫者弗誅他且搥心殆非威邊輯圉計也時  
巡按御史孫公與公忠義懸合計暮大同遂以  
其事下藩臬諸大夫議議成輒奏

皇帝若曰信茲怙亂其亟徂征之公乃符下諸將吏  
刻期畢集而簡委左布政使羅君瑤計儲侍右  
布政使馮君成能贊謀畫治餉則叅政王君官  
用叅議沈君伯龍護軍則副使李君江稽功則  
僉事周君思克以萬曆元年春三月二十一日  
公躬如敘州秉旄鉞誓於師曰嗚呼

皇帝所爲推轂予者亦維是蜀徼赤子委於毒醎將



拯之鼎沸之中而涼濯之爾等懋哉不則有常  
憲已廼謂鎮守總兵劉顯爾故嘗揮戈從蠻中  
立功名茲其益恢乃武以謝

上使過之恩以無替爾初謂原任總兵郭成安大朝  
叅將張澤等爾毋析於專裨其整乃徒礪乃銳  
以佐天討謂永寧宣撫奢効忠等爾世受

國如天之福其竭乃膂力毋二心顯等敬諾時所  
籍諸府衛兵若麾下募卒若所徵諸土司兵稔  
於和壘者十四萬人鸞旗熊旗明曜丘甸飲歆  
垆墜天聲所振嘽嘽如也泯泯如也公又進總

兵顯計師所嚮顯謂兵法當揣堅瑕九絲城賊  
勁兵所叢數難猝拔而凌霄都都乃其羽翼願  
奉募府威略先立幟此兩砦之巔然後併力九  
絲賊無異圈牢中物也公曰善會謀言凌霄城  
爲酋阿苟所據顯間誘出急縛之因遣別將攻  
下落豹諸寨五月初一日悉衆攻凌霄拔之公  
趣進軍焚平寨高寨六月十八日攻都都寨斬  
酋阿墨等於陳夜拔之時我兵鼓行無前蠻衆  
死創填槁崖谷而所鹵掠我竟內氓自拔歸命  
者日以千數由是賊大銷沮初蠻中酋僮桀者



平定縣志 卷之五十四  
竊號署曰王而阿大阿二方三其最魁黠云當  
是時阿大阻雞冠嶺阿二方三集勁蠻守九絲  
勢甚獷此兩地雄峙相望中間龐坂幽窳虺蟠  
蜿蜒必鑿空而後可度而阿大陽欲就撫與九  
絲賊陰相結為聲援偵我兵走陜中兩地將翼  
而擊之諸將訥實不敢進公密諭顯等間持銀  
牌綺幣招阿大以陰攜其黨復留馬湖天全土  
兵牽綴之而別遣人散招內官弔猴諸寨又厚  
犒遺降酋羅萬良等以為賊餌於是諸寨蠻咸  
踳跼顧望而我兵始得專事九絲矣顯乃分大

軍為五顯自將由黑帽山入其西成由印壩山  
入其南大朝由得窰口入其東澤由穀爆寨入  
其北別遣將由西南入與顯會以八月初九日  
俱壁九絲城下九絲山形盤礴第鬱上修廣可  
容萬竈而四面峭仄絕壁立蠻中天險也時公  
責戰甚急我兵盡銳仰攻晝夜不休止而城上  
酋亦殊死穿距環其山列柵九環柵削塹守以  
梟鷲藏礮伏弩俯瞰我壘雨擊之以是相持不  
下者兩旬前是土司兵調發習為賊哨以金帛  
比臨陳乃逗撓不戰以誤我師師數衄公知之



豫爲檄戒咸脅息亡敢翫者又散萬金募敢死  
先登士士踊躍思奮九月初二日効忠自簡昇  
兵剽銳者夜襲隘嘗賊賊力距乃卻初七日成  
統所部與酉陽宣撫冉維屏合賈勇直上逼鳳  
頭山幾至絕頂賊據扼不能進然遂持奪其地  
爲營賊咸震駭齧舌相告以爲官兵所未前見  
也翌日雨大注蠻以日者扞禦罷極會雨又九  
日擣寨不虞我兵至縱酒樂顯逆揣之陰戒把  
總吳鯨周于德平茶官舍楊正崇集漢土衝鋒  
兵千餘人夜半傳發乘雨銜枚腰絙攀挽而上

未明斬守關者徑薄蠻所蠻醉驚覺起距戰會  
夜蠻中相紛拏又爲我兵衝擊之自殘殺蹈藉  
死者無算而成大朝澤等更合兵譟而前萬旅  
沸渭無不人人一當百蠻不支大潰九絲遂破  
阿二方三狼狽逸出諸蠻麋而入巖箐我兵席  
勝疏捕殆盡餘復奔雞冠距我師二十二日成  
攻破其寨阿大逸出顯所部劉綖擒獲之十月  
十二日進破牡豬寨把總龔絡手搏方三於陳  
阿二窮蹙遠遯顯麾諸軍追至貴州大盤山擒  
獲之他遺孽亦皆根逐踵係靡子遺都蠻悉平



是役也下寨柵六十有奇燔營舍七千所擒斬  
俘獲四千六百有奇得酋王三十六人招安三  
千三百人拓地四百里獲銅鼓九十三面為蜀  
漢時物他器仗若牛畜不可枚數凱聞

上大嘉說告

廟薦勳坐明堂受其捷百官畢賀已乃降詔晉公右  
副都御史廕一子太學生總兵顯而下論功爵  
賞有差斬阿大等成都市初戎縣以有都蠻得  
名公以蠻旣平請於

上易曰興文并易九絲曰平蠻凌霄曰拱極都都曰  
都定印壩曰文印弔猴曰降蠻雞冠曰金雞內  
官寨地廣衍氣候甚善即其中列雉為城

上命之曰建武而環四方埴壤膏沃可畊遂均田授  
毗籍毗為伍設總兵僉憲坐填之隸以府同知  
一守禦千戶所一社學一其他寨柵砦築堡堡  
設戍為守於是文經武緯牙錯棊布棘柞之間  
巋然成雄鎮焉余惟都蠻在

本朝已入我提疆為編毗而逆節競於他夷此誠  
天誅所不宥然成化間程司馬信李襄城瑾統  
武旅十八萬費金錢鉅億計率師歷載屢乃克



捷久之又繹騷如故何成功之難壞之之易耶  
裔是用事者見謂難定率於徐蠕望藉口於撫  
以幸無事撫之不效則倉皇興擊而謀律無所  
當迄以兵老財單靡卒緒業於是撫與剿俱頓  
而賊滋驚矣公初至卽蒿目奮袂必欲翦此而  
後朝食當是時蠻已在公殼中比計定而發所  
用兵視曩者大征什減二三費不及什一然卒  
不淹時日而殲羣醜若割羊豕舉雄關若摧枯  
黃一何神也微夫精忠嶽立英略規運以濟斯  
勲不亦難乎當蠻旣平或謂宜稍樹其種落勿

絕之公曰絃不易則音不調根株不拔拱彘將  
復生遂決筴埽更瑕窟之習壹以中國郡縣文  
法存定之鄉者霾曠欽崎之域一旦劃爲文明  
廓爲清夷自此繼繼承承於千萬禩亡纖介之  
慮又何謀之周而遠也語云有非常之人乃有  
非常之事有非常之事乃有非常之功公所謂  
其人哉余覽史冊當唐元和間淮夷通誅獨裴  
晉公力襄神斷克清兇愍而諸葛武侯綱紀南  
中以輯夷漢至世世訾其天威今以公之跡推  
校前古其用師英斷法晉公其規廓疆理無遺



筴法武侯千古英雄之識何較然畫一如此而公以書抵余則曰茲非鄙人之能乃

天子神靈變化廟堂石畫所經營也詩不云乎顯允方叔荆蠻來威又云王命召虎式辟四方歌武功也然非宣王建中興之業任賢修政卽方虎欲展壯猷奏膚功其道無繇公之意蓋在斯乎蓋在斯乎會藩臬諸君來請余文以旌功伐遂悉紀其顛末而摛爲聲詩以附采芑江漢諸什將令

皇朝義征之烈鏗訇霍耀垂之來裔匪徒繫西人無窮之思爾銘曰維蜀徼上夷窟其中山川隔闕自漢始通獷彼都蠻尤怙巖阻狎爲不諛毒蔓我圉迄茲釀虐逆命驕天獰噬狙攫諭之罔悛我尚包荒蓄武未究彼昏鞫頑踉蹌而聞公之戾止奉敷威靈謀維金石斷則雷霆露檄上聞以請薄伐

皇赫斯怒錫之鈇鉞公拜受命靡康厥居卜日于邁以殄兇渠乃誓于師萬旅畢奮指授羣材如臂斯運鋪敦義勇虎賁鷹揚朱整日麗玄甲雲翔天戈一麾完魄縮挫擬險則夷摧堅必破旣翦



凌霄旋芟九絲踏被妖於樹我靈旗二三通孽  
 快不讐怖左跳右跋逞其螳怒載揚我武往搃  
 其吮或就微縻或膏刃鉞載蒐載犁如甌斯下  
 難落燄巢丹青絳野乃究乃度乃城乃隍以控  
 衿喉屹我金湯乃闢叢榛樹之閭臬狼烽既投  
 桑土斯徹乃輯遐疇噢咻其瘼爾安而棲不逢  
 不若厥壤之沃而廬而田昔也虎穴今也龍編  
 吉語四流昨歌且舞而今而後櫜弓臥鼓爰始  
 宣興厥日靡多儵起呻吟化為清和維公勝算  
 雨風莫測掀暄撥霧功在漏刻捷飛凱布貢厥

巒嘗高秩厚蔭以疇乃庸公拜稽首

天子聖武臣奉廟謨克寧茲宇

帝曰忠哉氓具爾思孰是勲勞而可擬之我求古人  
 維葛與裴翦亂定荒是曰雄才公功之烈載在  
 鼎彝公澤之龐浸于華夷朔有燕然南則銅柱  
 我銘西垂萬年之固

萬曆二年歲在甲戌冬十二月望日

賜進士光祿大夫柱國少傅兼太子太師吏部尚書  
 武英殿大學士知

制誥同知



經筵總裁

國史致仕南克陳以勤撰

戎平行奉賀

撫蜀間府大中丞確菴曾老先生平蠻旋凱之作序曰聖人作而西戎敘乃自古記之矣夜郎牂牁犍爲越雋諸郡沅涪瀘江青衣之所包絡戎雜居之率服荒忽雖同覆育之中未正賓臣之分而最獠蠻頑梗煩有司之缺削則都蠻其尤矣按地志都蠻在敘郡六縣之界卵育蕃久喜殺讎我民惡稔不宥語具蜀臣奏疏頃都御

史曾公奉

旨討罪平之以其地爲治於是諸戎警戢北逮羗狄南聯猺獞無不震懾非所謂聖人作而西戎敘者乎客有謂予曰平蠻之功豈不壯哉夫自漢檄開捷之諭逮宋亦著誓蠻之作千餘年間傷警未寧豈不由此醜類未盡之故哉聞之宣德時合六縣衆一大創又而平寧者數十歲嘉靖以來耳目睹記師行指壘而返以安輯報者又兩舉夫在綜核家俱當負失利之罰而邑井騷削廩虛伍缺卒無任其責者豈不可憾哉



平遠錄 卷之十四  
皇上承御

冲霄凝命方隅之臣皆顛顛精白仰荅

成命而西川之功尤爲表著者由公知道又復知兵也夫是役也以圍克書乃兵家勞師之忌而動不喻時役不再舉境內寧謐師中暇整宣捷普恩謹動朝野皆盛德事叟舊臣也宜爲之頌予應曰頌乃以功德告於神明此有位者事非予可代客又曰叟當爲碑應曰碑或出上與又復庶尹官正下逮童叟聯儷屬意乃俾中郎北海之倫執簡抒辭亦非予可獨任也無已則予史

官也採詩史職也其爲風人之辭乎乃作戎平行六百餘言小序曰夫戎平行者賦開府曾公靖我邦土也音辭跌宕文進爾雅叅軍供奉之駕雖未遽方而任華劉乂之鞭可驅祗役間序富順令途中制蠻之計事出實錄文不加點可謂奇之又奇公之成功兆決於斯乎三川葩藻洪華之士欲歌贊公美有不與予同聲者乎客讀詩罷喜謝曰壯哉叟之爲詩也夫頌在斯矣夫碑在斯矣夫

聖治昌徵戎羗戎底平四海寧萬曆改元未踰年西



戎亂者曰都蠻明年授鉞都御史曾公楚材生  
帝里風稜霜額額岳岳徂暑身征類諸葛九謀五間  
一日作都蠻聞之膽先落膽已落猶聚謀九絲  
凌霄堅莫愁糧糗只備三年求他山之石皆貌  
貅劉郭之旅溪滹霧毒難淹留言未畢大兵至  
山下火響千霹靂奪險燒積網羅迷空中忽起  
九雲梯天兵真從天上來烏雲龍虎何雄哉鴈  
陽秋蠻人憂月之望凌霄上月之晦九絲潰掃  
除鐵城如拉枯戈取震阿如匹雛提挾二將同  
平吳捷書飛報端門廬

皇情悅豫

兩宮愉宣捷廟告羣卿趨

皇帝萬壽同堯符克國五十先渠胥臣勞君逸為唐  
虞齋恩自天公偃軀微臣報國敢此需墾田拓  
地千里租棘荆捶成氍毹輸萬家煙火坤之隅  
蠻平待公來何遲噫嘻蠻平待公來何遲再說  
英豪出有時上客為予立斯須已未大工索材  
旁午公令富順受約大府率卒數百采入山阻  
遇蠻劫縣咆哮如堵殺人剖肝折屋以煮公曰  
且止予以計取令卒垂手各偃其斧乍出乍沒



散入岷岵賊疑兵壓又恐伏拒倉皇乞降斷頭  
於篋花劍未怒關馬未舞二豎之首已落如杵  
公笑啞啞棄置草莽天人合發殺機先露去十  
五稔來墾其土前已周郎今更尚父公來討蠻  
滅不待卜不待卜神告亡圍中有物憑枯楊美  
要眇今彌雲郎自云祖是諸葛遺青羗邇來千  
五百歲擊葛之鼓臨疆塲諸侯竹立者敢窺垣  
一方奈何不戒烏能襍爾不開今之開府竒才  
十倍臥龍翥鳳誰能當三千幕客皆干將佩干  
將騎騶耳彼都人士何方子一身五用穿雲度

水袖中三式吞子壘枯楊忽倒神已逝神旣逝  
今賊如殪賊如殪今石不厲石不厲鼓聲死腥  
風飄蕭吹楊起夜半無人問山鬼嗚呼天生天  
殺聖無知英豪樹立信有期賊公以才安所施  
特勞勇智來率師恭承我

皇三無私動合天道真男兒誰作頌德陳功詩老夫  
但採風人遺要與三川史祝竹枝巴俚世世同  
歌思萬曆二年春

賜進士出身榮祿大夫太子太保禮部尚書文淵閣  
大學士知



平蠻錄  
卷之十四  
制誥同知

經筵

實錄總裁兼掌都察院事致仕內江趙貞吉拜書

御史大夫大撫臺確菴曾公平南夷頌碑

萬曆元載冬十一月南夷平江陽遜史茹曰余  
考論裴中立平淮興事蓋樂嘉南績云南夷古  
瀘戎也自漢遣唐蒙通巴苻開犍爲郡治道置  
吏後諸葛孔明復蕩靖之嗣是擾馴弗一母論  
晉唐我

明興綏剿殊策亦母論暨周文安公經略至嘉靖中  
數反側僅羈馭無全籌乃隆慶壬申劉掠粵內  
萬劇前矣

今皇赫震命大中丞郢中曾公持節拊之公星駕蒞  
蜀坐閱酋狀乃

上疏若曰臣始至境偵知夷態叵測烏合蟻聚鳧起  
獸駭窮幻極詭無時無鄉非北虜可城戍非南  
倭可洋禦蜂虺之毒酷於豺虎腹心之疚烈於  
肘腋習然也矧猱棘實繁奈何舍近塞生靈  
供蠶食哉臣仗

天子德威先開誠撫之不則以單師嘗之俟其憬悛  
又不則奉行



天戈誓不以賊貽

君父付託不效請治臣罔誕罪疏入

制曰可聞以外弗遙制公聞

命以二月移敘觀兵卽檄衆曰南蠻拒降我知有戰  
今戰貴先能奪人又貴斷斷乃弗肘掣攣拘  
而先克有終故武王問大公曰吾欲未戰先知  
敵強弱豫見勝負徵尉繚亦云除害在於敢斷  
方猶壯而蠻荆威聲先也瑩帶狗而偪陽滅斷  
主也余往令富邑適

殿工需材芒檄督材丁千人采入高州時鐵石甫寧  
高夷嘯獫疑余假道兵之其脅從慮弗免遂磔  
二魁惡以獻余因行役諳悉險阨昔以材非詰  
戎也以令非專聞也况今仗

廟謨合諸將吏力必僥天倖焉已徵粟百萬鍾悉科  
稱之修輶輶除器械集土漢主客兵不下十數  
萬貔虎有將帷幄有諮躬所誓師近萬言又地  
辨六形勢規六如軍趨四利火分五攻審三氣  
戒八勿間謀必周購賞必重屠翦必漸棘時艱  
雖渡瀘以五月非躡肩除雪雖鬼方以二年非  
淹天日臨之母忽聞者皆泣下股栗或欲緩師



平蠻錄 卷之十四  
旋省或欲避疫延秋公曰業已先罔後已斷罔  
貳也將吏知

公不可奪遂攘臂鞠旅以七月壓境圍繞百匝  
刀斗聲警數百里頃之下凌霄城摧籬也頃之  
下九絲城扼吭也又頃之搗其腹心諸障若屯  
柵咸竹破瓦解犁掃延袤數千里俘獲男婦不  
可毛舉牛羊輜重委填山谷公下令集羣策善  
後始班師捷飛

天子將告成於

廟戮魁於

社賚勳於

朝而蜀人士稱公不在孔明斬雍擒孟下余獨矚  
公方淮蔡勳始裴中立爲中丞吳元濟在淮右  
不軌唐以中立曾諭魏博爲田弘正所憚遂遣  
閔蔡宣還奏行營曲折及諸將才品與攻取策  
時王李駁議朝執煩餉休師中立躬請督戰誓  
死不易卒建生擒元濟功夫震曰視蔡者先誓  
死滅寇者斷公昔聲先於高州則膽落都酋今  
斷王於節鎮則盟播華裔豈不與中立同科哉  
彼淮西拒命僅四十年又中原大陸利用武茲



平定錄 卷之十四  
蠻荒虬盤千百年其深山林叢率皆魑域羊腸  
非長戟短兵可刃游也視下蔡詎不稱艱且躓  
乎然中立遭值季造譴譴鴟張猶能以蔡功膺  
巷遇繫安危尋復招討河北留守東都駸登相  
業完名純嘏爲唐宗臣我公四十登壇逢偶  
明良泰階其所建樹所寵受較中立稱隆矣時賦凱  
按部官師父老及薦紳士謂公製錦舊區懼袞  
留莫再也屬茹揆慶詞茹惟平淮之役獨昌黎  
爲行軍司馬被命紀功以文獻柳河東爲刺史  
以雅獻茹草莽臣素乏載筆技爰私頌焉其征

南特傳俟諸信史頌曰於皇衍昨兮

聖明君四夷來賓兮聿修文蠢南夷兮阻庸蜀治不  
治兮泛羈束襟六詔兮帶牂牁負棘道兮塵  
天戈昔諸葛兮不復反視華運兮爲舒卷歷有宋之  
祥符遇寇城兮盟以詛繼熊本兮氓其圖迨趙  
適之專討旣猱附兮窺其島隨火攻兮摧厥槁  
當熙洽之

累朝清沙漠之天驕雖海波兮久不揚矧金方兮更  
陸梁

帝臨軒兮重推轂肆戎醜兮恣翻復爰疇咨兮眷太



平定縣志 卷之十四  
僕秉斧鉞兮莫要服中丞拜手兮畏此

簡書夜步乾象兮攬槍將除念臣爲令兮先聲薄虜  
今仗

威靈兮非斷莫武炎風掃稂莠兮頸繫旃裘朔雪入蔡  
兮異朕同仇厥壤曠兮張軍吏厥人黠兮教養  
昇

帝勤伐兮永鼎常茹作頌兮僅無當

賜進士進階中議大夫贊治尹山東提刑按察司副  
使富順甘茹撰

重刻確菴曾先生西蜀平蠻全錄卷之十四

重刻確菴曾先生西蜀平蠻全錄卷之十五

紀載

新修建武所城記

建武故山都地棘人屯聚寇鈔掠此蓋巢穴云  
異時戈矛所指往往搏景而還故棘人盤互自  
堅若虎豹咆哮於九關誰其堪胸而傳之仍也  
當元年之役都御史確菴曾公提大軍臨之誓  
諸將吏曰師不摩九絲之壘雖穿甲朽鏃不休  
也卒之高墉推而堅壁碎鄉者武夫健兒眈眈  
悼慄不敢闕足之域今五尺豎子可徒手行焉



公廼巡省指顧謂藩臬諸大夫曰嘻天地不蠻  
夷隔哉然山川何雄且都也矧厥壤沃厥穀蕃  
梗楠合抱之材大者足篋兕象葬之生茸茸彌  
山也是徼外之陸海哉其議城事已又曰夫山  
都不城則不戍不田則不屯必留驍將彈壓之  
頃兵置校庶幾哉據危而固險也其議繕莫府  
司署與墩堡事已又曰棘人繇漢通道來黠結  
侏離嗜屠裂甚於饑烏之攫食彼其腥風鼓扇  
疆土固污巖焉欲袞濯之非素王弗化也其議  
建學事已又曰此巨鎮中將校列夫營壘布矣

壇墀置矣藉令填撫觀察之使與憲大夫行部  
至節鉞奚止也其議飾傳舍事於是諸大夫睹  
公經措井井纒纒犁然當心也因庀財鳩工程  
能計日擇郡邑長貳之幹局者分任之而總帥  
劉君顯叅戎張君澤亦各率其衆操版築以從  
訾匪賦增役匪農占經始踰年而功成矣城週  
四百八十二丈上羊橋四百四十間下水洞二  
座三門各樓中爲兩院行臺爲兵備道爲總帥  
府爲安邊同知署爲坐管守備廳爲建武所爲  
倉儲爲學舍爲城隍旗纛廟外堡十五墩二十



二升而望之長堞巉巉穹樓巖巖塢壁棊置鈴  
柝畫榭環而覽之阪田刻施膏腴滲瀦闐闐若  
織周廬若帷蓋抗重阻而搃要害也史法城成  
必書又所名出自

上命宜特書故諸大夫李公楊公羅公陳公於不佞  
授簡焉長春按圖嘆曰茲地辱在蠻荒自剖判  
則然矣魑魅之與族狻猊之與隣日月猶羞燭  
之何論人羣也是役也通縣道爲版圖易編髮  
爲冠帶高城浚隍之間得以春秋耀吾軍士而  
令跳呼之徒化爲絃誦叩笮冉駝牂牁夜郎諸

君長胥振怖頽顙各願葆塞卽有驕蹇獷黠之  
謀亦竄首結舌而不敢動蜀中兵之日少惟此  
稱腹心之疾今乃得當俞跗湔浣滌滌霍然病  
已矣夫破鹵擒王殲巨寇若拉朽大勛也刷耻  
攄憤拯赤子於阽危大造也箸籌石畫使來者  
拱手而受成大計也視武侯擒獲散羗威鬯山  
徼不尤輝赫懾伏哉它若後將軍規金城之守  
新豐侯拊西涼之衆所稱善後諸冊何能及公  
什一也迺諸大夫協慮則蒿目柄事則執掌咸  
無愧媿媿之勞臣云公名省吾承天人城成之



平定縣志 卷之十五  
歲入拜兵部右侍郎李公名江武定人楊公名  
一桂豫章人羅公名向辰桂林人陳公名大壯  
廣陵人

大明萬曆三年歲次乙亥嘉平月朔

賜進士出身翰林院

國史修撰儒林郎富順李長春撰

崇報祠記

崇報祠者像都御史曾公而思報者也按祭法  
曰以勞定國則祀之能禦大災則祀之乃生祠  
非古也其因功而繫之思乎斯民也三代之所

以直道而行也此何可已焉都蠻蓋古西南夷  
危巢鬼谷丘陵曼衍素患中土而于今尤甚往  
往焚我宮室剔我士女掠我旄倪高珙慶筠長  
興之民日不堪命將胥衣冠之俗而附雕題之  
長矣昔天順成化時十八萬征之而不克嘉靖  
隆慶間數十年撫之而未寧安所決策哉萬曆  
改元曾公撫蜀上書其略曰

聖明御極殊方絕域重譯納貢喁喁然嚮風慕義無  
如蠻之負固者臣愚以爲剿之便總之劉顯善  
用兵橫彼口語願



明主彰使過之仁書奏

上俞允之公奮然秉鉞歲癸酉三月如敘誓師曰  
天子以蠻敷虐于爾百姓剝絕其命余恭行天罰嗟  
爾有衆最哉時土漢兵十四萬公以意投顯顯  
以身先士如身之使臂臂之使指也遂誘縛酋  
阿苟等五月一日至凌霄寨拔之六月十八日  
夜斬酋阿墨等至都都寨拔之時阿二方三守  
九絲又阿大阻雞冠嶺九月九日乘蠻被酒斬  
關而入至九絲寨拔之其小寨以百數斬首以  
萬數拓地四百里獲蜀漢銅鼓九十三面凱聞

上悅而告

廟百官稱賀晉公右副都御史蔭一子太學生總兵  
顯而下論功行賞始張官設學列雉爲城

上命曰建武所詳在大學士南充陳公碑中嗟乎漢  
通西南夷蜀父老不便也司馬長卿詰難之其  
言至今不廢云彼稱六合之內八方之外有不  
浸潤於澤者聖君耻之而况蠻爲大患如今日  
者乎即夜郎一綿三年未竟今功成數月耳人  
多言征蠻不便者假令拘文率俗如向來撫議  
真以湯止沸抱薪救火耳烏能成功哉公昔尹



富順往來敘南蠻在目中矣又

元輔荊州張公素知公才

主上問公何如人推心委任置顯謗書不問公倚之  
如長城操之如嬰兒得其死力以報

國兵法曰有必勝之將無必勝之民今觀之尤信  
讀公宗功一紀不自有其功意深遠矣越三年  
召公兵部侍郎蜀人建祠於新城若干楹顏曰崇  
報深山窮谷龐眉皓髮之夫感泣不能去以爲  
拯已於水火之中也三代之兵若時兩公宜永  
祀茲土哉叅政李君江陳君大壯叅議楊君一

桂僉事羅君向辰命燭伐石紀焉燭謂公之功  
無論太常所書卽百世口碑焉又四君皆佐公  
有勞者不具論獨論其大者如此公名省吾字  
三甫郢中人嘉靖丙辰進士

明萬曆四年歲在丙子夏六月朔日

賜進士第中憲大夫四川等處提刑按察司副使奉  
勅提督學校沔陽陳文燭頓首拜撰

### 平蠻頌

於戲夷狄竊發自古患之在英君睿主每注意  
守禦臣寮動集師轉餉嗷嗷若焦沒而克奏厥



績者鮮矣乃者我蜀都夷頑獷燔毒黔黎至厯  
皇上西顧之憂末大必折尾大不掉今日勢也反其  
勢而上衛社稷下澤生民幾何人哉幸而  
明公以文武之才智勇之德而主之以忠君愛  
民之心奉

命誅討嬰犯險隘而不辭措置分畫而先之征蠻諭  
檄以鼓軍帥之心志一兵卒之耳目賈不去肆  
農不離野十不易位而坐執梟獍於掌上山菁  
溪峒雉竄鼠伏真若迅雷不及掩耳疾電不及  
瞑目書之史冊足以垂耀千古矣嘗聞之楊子

曰御得其道天下狙詐咸作使御失其道天下  
狙詐咸作敵公以君之心爲心若股肱之翊元  
首將以公之心爲心若一家之保室廬兵以將  
之心爲心若四支之衛頭目此忠義感應之機  
得道之兵必勝之本也本具而天下無勁敵矣  
雖然理合君親忠孝一體公蓋所以繩祖武也  
首先公令吾邑寇至而捐身以禦寇却而民賴  
以安精忠貫於金石大義光於日月祖孫相繼  
心事相述忠也而亦孝也孝也而實忠也自是  
而銘太常祭大烝山川土田之錫圭瓚和鬯之



釐皆所必至者顧不休哉顧不休哉選樂太平  
之盛際慕世德之芳烈敢爲之頌以彰厥美頌

曰於赫

聖明痾我蜀患爰

命碩輔來訊來殲事非云偶任亦孔艱以志爲的以  
忠爲幹振塵而往銷烽而旋功成百捷動出萬  
全使智使勇使愚使貪有勸有賞有經有權攻  
之以道取之無難卓哉召虎名與之班

帝曰嘉止維汝之能匡濟王室慶流生民端委几席  
垂紳廟廷何敵不靖何遠不琛君寔爲檀邊吏

有勅傳臯爲輔起居有問拱手耶津潞望宿成  
畫象夷虜略名素燠鄭崇誠履匪勞物色鍾意  
賜縑無事羨歆乃作喉脣媿玠之柄乃作銓衡  
晉濤之令鈞國者誰東庄嗣胤民之仰之先公  
是承克承克顯永篤忠貞世世夔契生此德門  
天子有詔世懋爾勛庸釐以社大侈以文載筆之臣  
聽茲凱音宜體君意丕揚休聲 繡川教選進士

平蠻賦有序

大明歲在壬申我

天王出震繼離登大寶位改明年萬曆元年凡有血



氣者固不尊戴維戎夷梗逆王化顛越諸邑我  
大中丞確翁曾公昔視釜篆僕悉夷毒思遏亂  
略而未之逮乃今仗節鉞開府成都下車汛掃  
不期年而克平不世之奇功也今當旋軫蜀藩  
進相

天子蜀人瞻仰殊勛方將磨崖立廟以報公德繼禹  
也安養門庭憂釋梓里效顰屈宋爲賦一章明  
知我公春富郢陽調高磬雅而已歌蘆曲不足  
以奏竽門第感恩私有不容于喑嘿者昔政和  
乙未晏州夷反以趙適爲招討使平之續綱大

書馨香史冊公盡剿逆戎功高千古又出于通  
萬萬矣秉文筆者大書特書光輝信史當與天  
地相爲終始矣敢摭愚悃庸寫懋功其辭曰  
翳西南之戎夷兮爲六詔諸蠻之奧淵褰服化  
之無恒兮殆獸心而鳥言卓坤允之膏腴兮淮  
南紀滔土之原田出蜀山之苗裔兮又人皇支  
庶之別延胡不安于黃壤兮乃猖獗而頻年累  
征討而未克兮歷漢唐而已然僅威武之一快  
兮竽夜郎而首傳迄武侯之南征兮彼畏威而  
歛焰息肩肆嘉祐之斬捕涪井兮賜斗蓋之錦



袍銀錢暨慶曆之晏箇疆大兮賴熊本之經略  
精研當趙適之轉運梓瀘兮適籠漏肆毒于場  
鹽用三得而收五斗兮列忠孝以進秩坊團惟  
胡元之冒有諸夏兮彼歸順而不事鉅鉗入  
國初而守禦千兵兮尚出沒以垂涎繼糾烏芒而  
大肆妖喧兮憑汪芮之制率惟招討之靡定兮  
延禍及于文安匪大軍之覆壓兮胡招安而使  
平奈既息而復作兮誰敢執其笞鞭又失信于  
隆酋兮彼執夫報仇以爲言歷  
四朝而撫剿兮兵連八十餘年我

聖天子之嗣登大寶兮周召協輔而將領精專時如  
有待而功不浪垂兮荷大中丞之功德無前會  
開府而大行其道兮爰發軔于釜川灼招安之  
無益兮維剿絕而萬全繇是簡將而厲兵兮調  
發主客于腹邊峙餼糧于山嶽兮鼓士氣以衝  
天抗一疏于

九重兮得兩帥之鷹鷂破凌霄而絕往來之間諜兮  
拔都都而黃壤繼捐登翰音之嶺頭兮取婁猪  
如彈丸迺九日之登高兮簪黃花于九絲之絕  
巔傾巢穴而俯伏授首兮方信鴉飛不到之危



關被一朝而直上兮如履平地之無偏執訊獲  
醜而億萬計兮何五斗之囊搏服神謀妙算之  
迅疾兮若鯤鵬之垂于海騫飛捷音于豸府兮  
喜動夫吉甫之尊顏卽稅駕于蠻方兮勞將士  
之威嚴擊牛醜酒以賞大軍兮聲振林麓而騰  
歡蠢茲小醜之匪茹兮敢奮螳臂于輪團矧豸  
府寔聖門曾參之華胄兮卓諸籌策于子賤之  
冰絃出尺組而繫羣首之頸兮展檻車而收其  
渠魁之臭鬻纍纍啣壁而攸馘無算兮四郊鼯  
睡以成眠奏膚功于

聖皇兮命太史以書篇勒威武于金石兮鑄偉績以  
雄邊轉參旗而畫揆山箐兮始揚鉦而凱還繼  
馬竇之銘柱頌功兮統護軍之頸仰古捷歷萬  
年而精忠貫日兮與天地相爲周旋亂曰 鑠  
王師兮征都豸進神旅兮飛火磚鳥啣鏡兮煙  
蔽天筒噴石兮擊雲端昭勳億世兮紀神功于  
幅員

南溪闕繼禹 知府

平戎奏凱序

按蜀誌敘戎都蠻世居山險素善剽掠自昔以  
來惟以夷治之迄今生聚日蕃桀驁愈熾撫之



而旋叛守之而竊發高戎諸縣之民不勝其困矣肆惟我

明天子聖神文武欲犁庭掃穴以殄厥夷迺慎簡我確翁公祖撫循全蜀綜理軍務公不忍遽加以兵先走檄蠻方諭以德化令其歸順夫何負固肆殘彌劇癸酉秉鉞徂征以公之

祖先尹敝邑德政在人專祀有祠靈應屢著遂祇謁焉以冀陰庇即駐節敘南集兵儲餉畫議定謀衆志僉同至九月諸校雲翔三軍虎視不踰旬削平大寇如射隼焉全蜀士民咸舉手加

額曰我公天威也吾人從此得安枕矣啟蒙等一聞茲捷莫不稽首仰嘆曰公之斯舉也有五美焉都蠻爲患當事者未嘗振長策以制其命也公肅將天威一月三捷露布上聞帝心允豫宰輔而下雀躍稱賀不其快哉是公一戰而紆

九重數百年西顧之憂可謂忠矣且蠻夷肆毒殺人父兄虜人子弟辱人妻孥毀人廬舍老稚之野哭巷號者不可勝數今乃懸首於市暴屍於途凡孝子慈孫孤嫠弱稚咸目攝而手刃之亦可



平齋錄  
以報恨於地下人矣是公一戰而解千萬人幽  
明之憤可謂仁矣然夷性樂戰凡我兵之屯戍  
者未嘗得志於一逞今一朝而擒厥渠魁以歸  
鳴鉦擊鼓凱歌滿道不自公倡之哉且使天下  
之人皆知夷不足畏而猛氣英風勃勃雲起是  
公一戰而作中國昌大之氣可謂義矣昔恃其  
悍以輕我兵今則手縛其軀刃碎其骨使諸夷  
落魂互相警戒曰方今

聖主當陽臥龍復出不敢鳴弦抵掌於邊鄙是我公  
一戰而挫四夷猾夏之志可謂武矣且喜椿萱  
並茂聞膺重寄夙夜祇懼今捷音便報則闔門  
子姓捧觴稱慶不其愉哉是公一戰而慰二親  
倚門之望何其孝也夫大兵一舉五美咸萃以  
光先烈以靖方來視昔淮蔡之平度越遠矣我  
公之功何其偉耶公方退然不有其功思求底  
靖於永久行且入相

天朝翊景運於磐石樹奇勳於彝鼎端自茲始矣奚  
止我蜀之受其庇已乎抑豈我蜀之所能專其  
庇已乎顧予無似敬布蕪詞以志忻忭云

金堂何啓蒙 同知



平蠻凱旋敘

皇帝御極之元年冬十有一月實我大中丞公平蠻凱旋之日也凡鄉之大夫士相與慶於國商賈都邑之民相與慶於市窮簷豁谷黃童白叟之衆咸忻忻然舉手加額相與慶於野翺等幸釋桑梓之虞快覩曠世之烈僉圖效一言以頌因命小子鶴敬敘厥事鶴乃拜手稽首颺言曰竊聞奏非常之功者抱非常之才者也有非常之才者必非常之人也愚常執此以上下古今旁稽載籍凡伐遠之勳炫赫宇宙者非不偉且衆

也然或前有可擬後有可倫能得遠人之疑而未必能致其衆能致其衆而未必能空其類能廓清於一時而未必能蕩滌其數千百年之患能寧謐於一世而未必能貽數千百年之安要之可以言功之偉也而未可以言非當之功也惟茲醜虜粵自漢唐宋元以來爲我西蜀東南之患亦已久矣其間英雄之主智勇之臣非不多也未聞有窺入其阻鋪敦其地丕振薄伐之威以收孔淑之績者矣迨我

國朝景泰成化間常兩奮



天討矣常時震驚之威凜如秋霜然僅致其稍馴而止撫綏之仁藹若春溫亦徒得其空名而罷近年以來生齒日繁而虜亦衆矣侵疆日闢而地亦廣矣逋逃日聚而黨益植矣知識日狡而機益深矣戈矛盾甲之器日已磨礪而兵益利矣林木菁寨之阻日已凌雲插漢而地益險矣以此方張之虜大肆吞噬之害凡茲戎珙千里之間被其屠毒可忍言哉則今之都蠻非昔之都蠻也

先皇帝履西顧之憂已常特遣重臣大將授斧鉞而征之曾四年於茲矣而非常之功固有所待也我中丞公以名世之重望被

命西來即躬詣其地按圖考索周爰咨諏奮然仗劍而作誕進諸將士而誓之曰

先皇帝之綸綍尚嚴

今上之簡書方新報

先帝而忠於

今上此正吾與若等之職分也吾殆與此虜不並立矣諸將士聞之咸振勵鼓舞罔有疑貳於是痛懲往事之失盡排招撫之議不揚肆伐之武指



陳方略而探巢搗穴勢如破竹運量機宜而執  
訊獲醜應若指掌不數閱月遂深入險阻而是  
絕是忽俾靡有孑遺仍經畫其地建以城府聯  
以官屬以聞一代疆域之區則自漢唐宋元以  
來上下數千百年未易克之虜一旦克之而無  
餘也上下數千百年西蜀未易靖之患一旦靖  
之而無難也其視衛青上谷之討亦烈矣而胡  
終不可滅克國先陵之禦亦勇矣而羗終不可  
平雪夜之入敵人雖破膽矣而蔡州之孽自若  
汶山之款羣醜雖已稽首矣而陰平鬼分之寇

固在擬之中丞公今日平蠻之績可同日語哉  
是故遡之數千百年之既往可謂無前推之數  
千百年之將來可謂無後其殆天篤

明祐鍾靈降神挺生我公以佐

中興之烈者與易曰師貞丈人吉詩曰文武吉甫  
萬邦爲憲其公之謂與行當躋台鼎秉鈞衡以  
左右

明天子則鷹揚之勇震疊於九邊克壯之猷風動於  
百蠻文武備於一身而

宗社賴以奠安海宇恃以無恐又豈但西蜀一隅之



地永怙其休而已哉

成都于鶴

知縣

先刻征蠻奏議序

附

君子之有所爲於天下也皆其所不得已也不得已者生生之幾也幾發於天而人不與焉古之聖賢視其身之爲天而不知其爲人也故其無事也寂然虛而已矣及其起而應天下之變則若風雷然有莫知其所以者幾之所通視天之饑溺者匹夫匹婦之不得其所者咸取而加之吾身曰由已若此者豈聖人爲之哉天也聖學本天故其所不得已也故雖窮知以思屈力

以圖以排決乎大難覆露乎羣生而不自慮也不自爲也故曰動以天此孔門求仁之旨而覺者鮮矣讀

確菴曾公征蠻奏議其事業文章彰明較著者人而知之也知之而未能知者其幾乎異時棘蠻稱亂暴戾恣睢敘瀘以南老稚接踵而死於蠻者數十里矣顧其危巢鬼谷莽叵晝昏人力無可與焉故興擊之議衆難塞曾莫有決者公下車則曰予固蜀撫也民之接踵而死於蠻者予



平定縣志卷之五十五  
之辜也版章之民胥爲夷也予則推而內之也  
毅然起而任之上書

闕下振旅徂征若剥膚之爲傷而沃焦之孔亟也一  
體精神貫乎金石是故籌之鬼神運之將吏霆  
擊風馳訊執醜獲西南以寧則復條具便宜上  
之

天子築城列寨置吏陳兵則壤經賦建永奠之長策  
而勞來安集以回兵後之春者諸所注措靡不  
周焉公之大造於蜀也經綸開濟之業炳炳然  
具奏牘中海內推公功業方掀揭宇宙乃公則

非以功名自命者而其如是汲汲者何以故耶  
吾心即宇宙也宇宙即吾心也故一隅之閉吾  
氣不流一夫之寃吾神不貫矧其爲數百里之  
陷溺且垂數千百年者耶此深乎幾者之所不  
得已也乃其圓機妙用博大而神潛剛柔協中  
文武備具又孰非此幾之所自爲乎易曰知幾  
其神陽明先生定難攘夷功蓋天下而曰此時  
只有良知作用嗚呼其旨深矣然則公之功公  
之學也成能旣請公疏而刻之使後之經略西  
土者有所式而復表公之所以爲是者之心使



天下後世不徒以功業視公也遂僭爲之序萬曆甲戌夏四月朔四川等處承宣布政使司左布政使馮成能頓首謹序

先刻征蠻雜錄敘

附

### 征蠻雜錄錄

中丞確菴曾公軍中嘗所經綸籌畫之大略也公受鉞征徙笮諸蠻部期年討平之則旣已戡酋王殲部落略其地于版圖胥荒服而衣冠臣妾之矣此其蓋世之勲當必有天授神謀者以注措乎其中而非錄之所能該也王文成公平

逆壞戡大難嘗自謂機宜之秘匪言所喻即若孫子所謂間不能窺智不能謀者吾輩之請錄是也母乃非要乎夫雷霆之震不可以藏其聲衡嶽之見不可以秘其形誠有之矣夫誰得而掩諸語曰前事之不忘後事之師也今之士紳有能神一采效一策者咸欲法而陳之以表垂常式醫師妙訣脈之術而起一人之生則將爭索其方書而傳之爲其驗也孔明之興漢室其至今存者詎直出師二表云哉教令章檄未嘗不彰彰著明也然則茲錄也與公之奏議並傳



無惑也况乎拯六邑湯火之民洗億兆人積世  
釁邊之恨而振

國家二百年旁暢之威其嘗試之效蓋俞跗之方  
書而武侯之篋策皆有俾于將來者也雖欲不  
彰而傳得乎要之原公之烈者舍是不可而專  
謂是焉亦不可也蓋鞠恭靖獻者公之心寧靜  
澹泊者公之學而虛明果斷者公之才有本者  
固如是已至于

龍起富水而雲從

聖作曆元而事起茲又明良相逢千載一會所謂天

授所謂間氣將開濟于無窮也平蠻之蹟殆其  
緒餘哉

萬曆三年歲乙亥秋七月之吉

四川等處承宣布政使司左布政使番陽鄒光  
祚頓首撰

先刻西蜀平蠻錄敘

附

自古受命帝王曷嘗不用事於四夷蓋有用之  
它方而功較著者矣未有得志於西南夷者  
也山都者當川貴交郡縣若世官其土者大牙  
錯蠻獸保聚蹂躪其間厥地阻深其人恣睢聲



教若不相及是以得志用希所從來遠矣  
明興二百年蓋十有一征云而天順成化之際最大  
至煩大司馬在行間合別部兵幾二十萬歷四  
年僅克大壩距其巢九紘者不一舍竟以阨塞  
棄歸浸淫至於嘉隆間稔惡極矣蓋始未嘗不  
欲一切姑息馴服之而後稍陵夷桀驁也昔人  
在事豈不多賢度不無善畫者莫能圖何哉則  
臣主異指文武不並用之效已

今上初卽位乃睠顧西南隨簡命御史中丞曾公往  
填撫之公至而境內日上變乃請亟發兵誅山

都蠻當是時羣臣譁言蠻卽可征豈至今茲撫  
之便

天子意不爲動而獨仰成今元輔江陵相公相公故  
嘗知曾公於監司時謂足辦賊以撫蜀薦者也  
會言者追論大將軍顯罪相公使報曾公臨敵  
易將於法必敗第令顯不効并坐之耳前大將  
軍成有戴天之憤宜以佐顯六縣民心怨賊次  
骨可因而使之我徵兵集餉爲坐困之形而募  
敢死士爲奇兵擣其虛姑翦滅此而後朝食茲  
其時也曾公奉茲



廟謨不遺餘力宣布意指慮無不動與機應者故挾  
月者四而克凌霄都都九絲諸城若大小壘以  
百數俘馘及所林滅者以萬數山都遂平置官  
吏繕城郭興學校供賦役比於諸郡縣自用兵  
以來未始有成功若斯之亟也夫叢爾棘蠻易  
若舉之股掌上

天子至爲動色咨之相公相公坐而運籌策帷帳之  
中決萬里外勝算以授曾公曾公程督諸將吏  
以伸必然之畫又大將軍顯若前大將軍成者  
相然信以死計不反顧然後功見而忠著以

廟堂謀斷若此閩以外其所相慕用之誠又如彼蓋  
用力若斯之難也而說者曰曾公在軍中時嘗  
晝夢一神人披髮仗劍類今所崇祀玄武神者  
垂天而下公繇此破賊遂如振槁蓋若天所助  
焉異哉所聞乃今信之天厭夷德之日久矣

主上奉天嗣曆存撫寓內冠蓋之倫莫不并包單于  
稽顙欵關納貢藉令棘不變服而蠻不化俗終  
豈非編列之戶與齊民異嚮哉夫非常之原黎  
民懼焉及臻厥成而天下咸晏如也曾公大征  
之請實惟元老翼贊



平蠻錄 卷之五  
威斷動於九天之上而震之重淵之下以臻殊績嚮  
如盈庭之議無論六縣全蜀之黔首必無幸矣  
由斯以談

主上之信嚮元老俾專壹其志而推轂曾公申其石  
畫者豈非天哉豈非天哉非

大聖孰能當此受命而成功得志者乎曾公之門下  
士許侍御一德高比部文炳王民部完次公先  
後所上疏若所著功宗紀若文告書牘之辭并  
蜀薦紳先生頌公者列焉以昭百世之伐余爲  
志其原如此

萬曆己卯秋九月吉

賜進士出身翰林院掌院事侍讀學士奉直大夫

經筵 日講官同修

國史 會典知

起居注督理清黃信陽何洛文頓首撰

先刻平蠻錄跋語

附

萬曆癸酉曾大中丞先生奉

簡書平蜀都蠻檄文炳執役戲下出入蠻瘴中見蠻

地延袤四百里四面阻山山形若劍錯且陡峻  
蠻故依險出劫敘瀘州縣所至焚戮殆盡先生



不忍斯民之阽危決意剷除之由上疏  
請兵以迄成功纔五閱月耳遂盪平千百年凶殘之  
寇拯百姓於湯火郊無亭隧冠蓋相靡於道自  
漢唐以來稱絕徼者今爲樂土厥功懋哉蓋先  
生奉

廟堂成算因形設竒全而取勝誠有如功宗所紀與  
吾師何太史先生序論之詳矣第文炳橐筆而  
履戎行終始知先生所以克成于襄之烈勞心  
焦慮非偶爾也先生麾蓋臨敘南州縣告急日  
至某所蠻殺男婦若干矣某所被虜若干矣先

生卽涕淚潸潸下歎曰我爲

天子撫全蜀迺忍見蠻日傳刃吾赤子腹中喋血塗  
地乎意氣彌厲恨不滅此而朝食也會構疾日  
不下撮米而簡師庀賦檄將督戰虎符交馳殆  
無虛畧一念忠

君卹民凌遽鞅掌勤殷懇篤真可貫金石而格鬼神  
至於開誠布公延攬羣策卽廝走下賤有言便  
計者先生無不降體而受之欵欵務畢其謀謀  
而臧則獎勞特至用若轉圜謀而不臧先生亦  
未嘗疵瑕之也故人人自奮爭出其死力雖椎



結羈靡之倫非隸尺籍胥環甲負蘭率衆先驅  
矧文武將吏尤鼓舞有素日見先生之憂惕忍  
懷諼而解媢耶是故能使怯夫鼓勇懦恣赴節  
費省而績鉅時淺而究弘所以上成  
廟謨而樹無前之偉烈厥有以哉藉令主

國是者未必決萬里外籌筴而握兵柄者未必以精  
誠感格乎天人竊恐斯役也亦順成間故事耳  
則是功之建果易乎抑不易乎文炳不文聊述  
先生焦勞之心與休休之度附一言於簡末俾  
他日有事於西蜀者得攷而知之若其石畫徵

於疏牘機略詳於檄文施爲次第載於雜錄微  
亦威稜激發將士備於尺牘筆籌几覽是編者  
咸得窺其神妙文炳則何敢贅焉

萬曆己卯冬十月吉旦門生高文炳頓首拜書

重刻確菴曾先生西蜀平蠻全錄卷之十五